

**ENGONGO PAUFUPI
KOMBINGA YOVETA
ONTI-4 YOMUMVO 2003
YOKUKEELELA
OMAHEPEKATHANO
MOMAGUMBO**



**LEGAL ASSISTANCE CENTRE
Oshiwambo
2005**

Membo ndika omu na eyelithilo lyayela lyOveta yomumvo 2003 yi nasha nOkukeelela Omahepekathano mOmagumbo. Embo otali yelitha mo nawa oveta ndjika ompe melaka li uvitike ko nawa nokugandja ii-holelwa yi ku kwathe u uve ko nawa oveta ndjika.

Oshitopolwa kehe shembo osha ulika iitopolwa yoveta mbyoka to vulu okutala mo opo u mone omauyelele ogendji.

Ope na wo okambo okafupi ke nasha nengongo lyoveta ndjika ompe moka tamu yelithwa iitsa noma uyelele ga simana. Oto vulu okumona okambo haka okuza pEndiki lyOmakwatho gOpaveta (Legal Assistance Centre).

Iinyolwa: Dianne Hubbard & Anne Rimmer

Omathano: Nicky Marais

Omapeko: Ethano kepeko Nicky Marais a kumikwa kethano lyonakuhupa momahepeko gomomagumbo moNamibia ngoka ina hala edhina lye li nyanyangidhwe.

Omutoloki: Gustaf Iiyambo Tomanga


Enyanyangidho: Printech cc

Omugandji goshimaliwa: Embo ndika olya mono eyambidhidho Austrian Development Cooperation, Humanistisch Instituut voor Ontwikkelingssamenwerking (HIVOS), Lawyers Association of Malaga (Spain), Namibian Literacy Trust, United States Agency for International Development (USAID).

Austrian
Development Cooperation



LAWYERS ASSOCIATION OF MALAGA (SPAIN)



Omunyanyangidhi: *Legal Assistance Centre*

© Legal Assistance Centre, 2005

P.O. Box 604, Windhoek, Namibia

Tel: 061-223356

Fax: 061-234953

Email: info@lac.org.na

Website: www.lac.org.na

Iitopolwa yembo ndika otayi vulu okuningwa ookopi pamalalakano gelongo, shampa ashike onzo tadhi tumbulwa.

I IKALIMO YEMBO

OMUKUNDU GOMAHEPEKATHANO MOMAGUMBO MONAMIBIA.....	3
Omitotolombo dhi nasha nomahepekathano gomomagumbo	4
Iitsa ya simana kombinga yomahepekathano momagumbo	6
Okugulu kOmahepekathano	9
Okugulu konkalo yaa shi yomahepekathao	10
Efatululo Lyiita Yopaveta	11
OMAHEPEKATHANO LYOMEGUMBO OSHIKE?	12
EKWATATHANO LYUUPAMBELEL/LYOMEGUMBO OSHIKE?.....	15
ETALULULO KOMBINGA YOVETA	17
OMALOMBWELO GEGAMENO LYOPAVETA	18
OMAPOGOLO GOMAHEPEKATHANO GOMOMAGUMBO.....	35
OONKONDO NIINAKUGWANITHWA YOPOLISI	42
ONGONGA YOMIYONENA	Menilyepekol Yahugunina

Ngaashi Aanamibia oyendji, ngame wo ondi na elimbililo kombinga yeindjipalo lyomiyonena dhopethimbo ndika moshilongo shetu, unene omahepeko gonyanya taga ningilwa aanenguni moshigwana shetu, ngaashi aakulupe, aakiintu naanona... Omiyonena dhika otadhi ulike omayo-nagulo guuthemba waantu yetu. Ayehe mboka taya ningi iikulumuna mbika oye na okupangulwa nokulya iiyimati yiilonga yawo. Ngele oya monika ondjo, oye na okugeelwa pwaa na ohenda. Natango otatu uvithwa nayi kekanitho lyoomwenyo dhaagundjuka yetu oyendji, dhoka tadhi hulile ondjilakati omolwomaihumbato guupwidhi gaaniimbuluma mbaka. Ngashingeyi Ontontwaveta yEkeelelo lyOmahepeko gomOmagumbo sho ya pitithwa mOparliamende, onda tegelela kutya iikaha yaanambelewa yetu yOpolisi nOompangulilo otadhi ka kondopalekwa okuungauka nawa netulo lyoveta miilonga oshowo uuyuuki.

Omupresidende Sam Nujoma, Oshipopiwa she kOshigwana, 31 Maalitsa 2003.

Ooveta odho iilongitho mbyoka tayi ke tu kwatha okwaadha oshilalakanenwa shetu, kakele uuna ashike omaihumbato gaantu taga lunduluka, ngele hasho ooveta itadhi ka sindana.

Omusimanekwa Nandi-Ndaitwa, Ominista yLinima yOomeme nOnkalonawa yAanona Oompata mOparliamende kombinga yOveta yOkukeelela Omahepeko mOmagumbo.

OMUKUNDU GOMAHEPEKO MOMAGUMBO MONAMIBIA

OMAHEPEKO MOMAGUMBO

Omiyonena dhoka hadhi holoka mefamili
nenge momakwatathano gopaupambe.

Omahepeko gomomagumbo omathimbo gamwe ohaku tiwa “iihuna, omadhengo gonyanya nsht.” Ngele iihuna mbika oya holoka pokati komusamane nomukulukadhi, omathimbo gamwe ohaku tiwa “elongithonayi lyomukulukadhi” nenge “elongithonayi lyomuholike.” Uuna aanona oyo ye li iihakanwa, olundji ohaku tiwa “elongithonayi lyokanona.”

Omahepeko gomomagumbo otaga ehameke unene molwaashoka egumbo nefamili oyo omahala moka aantu kwa li ye na okukala ye uvite uugumbo negameno li ihwapo.

Nonando aakiintu ohaya vulu ngaa okukala aakolokoshi, olundji oomeme naanona oyo iihakanwa yomahepeko gomomagumbo taye ga ningilwa kaalumentu.

Omiyalu dhomahepeko gomomagumbo otadhi “halukitha”

Ope na omiyalu dhoka ohela tadhi hokololwa tadhi “tilitha,” sho omukiintu gumwe gomaakiintu yatano taku hokololwa e li nekwatathano tali mu monitha iihuna, oshowo omukiintu omutitatu gomaakiintu mboka taku lopotwa a hepekwa kolutu nenge paihulo komuholike gwe. Ope na wo omiyalu dhoka tadhi ulike Namibia ongoshilongo shoka shi na omahepeko gomomagumbo ogendji taga sitha ohoni. Osha holoka wo polweela ohela kutya kakele keindjipalo lyomahepeko ngaka, aakiintu yevulithe yahamano yomaakiintu 10 mboka yi iyadha ye li momakwatathano goludhi nduka giihuna ihaya ka konga omakwatho. Ishewe, aakiintu yevulithe gumwe yomaakiintu yatano kehe mboka ye li momakwatathano mu na omahepeko ihaya lombwele nando omuntu gwontumba kombinga yiihuna mbika. Omayalulo ngaka taga halutha okwa li ga pitithwa ohela mOvenduka, sho iizemo yekonaakono lya kwata miiti kombinga yomahepeko gomomagumbo moNamibia, ga ningilwe okuza momumvo 1999 – ga tseyithilwa oshigwana sha ningwa mEsiku lyOpaigwana yOkuvudha mo Omahepeko gAakiintu nAanona.

The Namibian, 26 Novomba 2003

Onda hala nokuhalelela okuholola elimbililo lyandje kombinga yeindjipalo lyiikulumuna tayi ningilwa aakiintu naanona. Iimbuluma mbika otayi ulike eyonagulo enene lyomauthemba gopetameko gaakwashigwana yetu, oshowo okuyonagula edhina ewanawa lyoshilongo shetu. Iilonga mbika yuupwidhi onkee oyi na okunyanwa nokuvudhwa mo thilu.

Omupresidende Sam Nujoma, eegululo lyOparliamende, 11 Febuluali 2003.

OMITOTOLOMBO KOMBINGA YOMAHEPEKO GOMOMAGUMBO

- **“AAKIINTU OHAYE GA PULA”:** Omathimbo gamwe aantu ohaya ti kutya aakiintu “ohaya pula” ya dhengwe oshoka ohaya shongo aasamane yawo, nenge molwaashoka ya ndopa okugwanitha po iilonga yimwe yomegumbo – ngaashi aniwa okwaateleka iikulya pethimbo. Ngele omukiintu okwiininga omuhona, omunyenge, kee na uuyogoki nenge e na omutse omukukutu, aantu yamwe ohaya ti kutya omukiintu okwa pumbwa okuuthwa.

Shika kashishi oshili. Iiyetwapo oyindji kombinga ya nkene omukulukadhi e na okwiinhumbata oya kankamekwa komadhiladhilo gombinga yimwe ngoka kage li pauyuuki kaakiintu. Kutya nee omukiintu okwa ningi sha nenge e shi popya, kape na omuntu e na uuthemba oku mu dhenga. Kehe gumwe oku na oshinakugwanithwa shopaveta okwaalongela yakwawo omiyonena. Okulongitha uukolokoshi kaku shi omukalo gwa taambiwa ko okukandula po omukundu gwontumba megumbo.

- **“NGELE OSHIWINAYI UNENE, OMOLWASHIKE NEE ITE SHI THIGI PO?”** Aantu yamwe ohaya ti kutya aakiintu oye hole lela shili okudhengwa kaasamane yawo nenge kaaholike yawo, oshoka oye hole okupangelwa kaalumentu. Ohaya dhiladhila kutya aakiintu oye hole okudhengwa opo aniwa ye shi tseye kutya aalumentu mboka moonkalamwenyo dhawo oye na nayo shili nohaye ya sile oshimpwiyu. Aantu yamwe ohaya ti kutya aakiintu ihaya simaneke we epangelo lyaalumentu ngele ihaya dhengwa. Yamwe ohaya dhiladhila kutya omukiintu ngoka ta fadhuka po ekwatathano lyomahepeko, olundji natango ota ka mona ashike omukulumentu gulwe omukolokoshi. Aantu yamwe ohaya ti kutya ngele omukiintu ina hala shili okudhengwa, oha thigi po ekwatathano lyomahepeko.

Omapopyo ngaka kape na ngoka ge na oshili. Kape na shili omuntu e hole okudhengwa. Omiyonena ohadhi vulu okweehameka onkalonawa yopambepo yomukiintu oshowo olutu lwe. Aakiintu mboka haya dhengwa ohashi vulika ya adhike komadhiladhilo omawinayi shi nasha nayo yene. Ohaya tameke okwiitaala kutya yo “aawineyi” oshowo kutya oya gwana okudhengwa. Iinima mbika ohayi dhigupaleke omukiintu ngoka ha dhengwa a thige po ekwatathano lyawo nenge a ka konge omakwatho.

Omukiintu ngoka ha dhengwa ohashi vulika a kale neiyuvo lyethiminikilo mekwatathano oshoka pamadhiladhilo nopainiwe okwiikolelela momulumentu ngoka he mu dhenge. Ohashi vulika a dhiladhile kutya otashi ka kala shi li muuwanawa waanona ngele efamili olya kala kumwe. Omukiintu ohashi vulika a kale neitaalo kutya omulumentu ngoka he mu dhenge ota ka lundulula ngaa omikalo dhe esiku limwe. (Aalumentu mboka haya dhenge aakiintu olundji ohaya ti kutya oyi ipa ombedhi konima, nokuuvaneka kutya itaye ke shi ninga we – ihe olundji ohaye ke shi ninga ashike). Omukiintu ohashi vulika a kale nuumbanda kutya omusamane gwe otashi vulika e mu dhipage nenge aanona ye ngele okwa kambadhala okukonga omakwatho. Ohashi vulika omukiintu a kale neitaalo kutya oku na oshinakugwanithwa okukambadhala a ninge po sha opo ekwatathano li kale nawa. Ohashi vulika a kale nuumbanda kutya ookuume ke oshowo efamili lye otaye ke mu dhiladhilila kutya oye e na ombedhi ngele ekwatathano lyawo olya teka.

Ope na omatompelo ogendji kutya omolwashike kashishi oshipu komukiintu okuthiga po onkalo yiuhuna – ihe shika itashi ti kutya omukiintu okuhole okudhengwa.

- **“SHOKA TASHI INYENGE MENI LYEFAMILI OSHINIMA SHOPAUMWENE”:** Aantu yamwe oye na eitaalo kutya ondjokana oshinima shopaumwene thilu thilu. Ohaya dhiladhila kutya shoka tashi inyenge meni lyefamili/egumbo kashi nasha nomuntu gulwe gopondje.

Shika kashishi oshili. Shoka tashi inyenge meni lyondjokana ohashi vulu okuguma oshigwana pamikalo odhindji. Oshigwana oshi na eitulomo okushilipaleka kutya aantu ayehe pomudhingoloko oye li megameno, meni nopondje yomagumbo gawo. Aantu mboka haya putuka momagumbo gomahepeko ohaya vulu wo okulongitha uukolokoshi yoyene – oshoka oyi ilonga okwiitaala kutya omahepeko/iihuna oyo omukalo gokukandula po omikundu. Oshigwana oshi na oshinakugwanithwa okukambadhala okukeelela omaupyakadhi ngoka tagi indjipaleke ondondo yuukolokoshi moshigwana.

Omahepeko gomomagumbo ohaga pula wo oshigwana oshindji. Ohaga kanithitha oowili dhiilonga neindjipalo lyomayakulo gopaukalinawa. Oge na wo enwethomo enene keindjipalo lyoondondo dhiikulumuna nomahepeko, nohashi etitha wo omutenge gwa gwedhwa po komapepe gaapolisi noompangulilo. Omathimbo gamwe oge na wo enwethomo keindjipalo lyelongithonayi lyiikolitha niingangamithi. Iihuna yomagumbo ohayi yi moshipala omapendulopo gopashigwana, pakukeelela iihakanwa, aahepeki noshigwana shi vule okukoka nawa.

- **“IIKOLITHA OHAYI ETITHA OMADHENGU”:** Paempito dhimwe aalumentu ohaya longitha iikolitha ongetompelo lyiihuna/uukolokoshi. Aakiintu mboka haya dhengwa ohashi vulika ya dhiladhile kutya omahepeko otashi vulika ga hule ngele omuntu okweetha po okunwa. Ohaya vulu okudhiladhila kutya uukolwe owo hau etitha omahepeko niihuna.

Shika kashishi oshili. Aantu oyendji ohaya nu ndele ihaya ningi aakolokoshi, oshowo aalumentu oyendji mboka ihaya nu ohaya dhenge aakulukadhi yawo nenge oohonda dhawo. Osho shili kutya iikolitha olundji oyi li oshitopolwa shomakwatathano ge na omahepeko. Omatompelo kutya omolwashike omulumentu ha nu, na omolwashike omulumentu oye tuu ngoka ha longitha uukolokoshi ohashi vulu okukwatanithwa. Iikolitha ohashi vulika yi etithe uukolokoshi, ihe omatompelo kutya omolwashike aluhe pe na omahepekathano oshinima sha kitakana unene.

- **“OMAHEPEKATHANO OHAGA HOLOKA UNENE MOMAFAMILI GAATHIGONA, NENGE KAAKIINTU MBOKA INAYA LONGWA”:** Aantu yamwe ohaya dhiladhila kutya omahepekathano ohaga holoka olundji unene momagumbo moka aanegumbo haya nana nondatu okuhupa noshimaliwa inashi gwanena. Ohashi vulika wo ya dhiladhile kutya aakiintu awike mboka inaya longwa haya dhengwa kaasamane yawo.

Shika kashishi oshili. Omahepekathano ohaga holoka momaludhi gomagumbo agehe – omagumbo gaathigona naayamba. Omahepekathano oge li omukundu momihoko adhihe moNamibia. Omaludhi agehe gaakiintu ohaya mono iihuna komahepeko – mwa kwatelwa aakiintu mboka ya longekeka ye na iilonga iivanawa. Omahepekathano gomomagumbo omukundu gwa tanda ko oshilongo.

Ekonaakono lya ningwa kOkakomisi kOmapendulopo nElundululo lyOveta oshowo Osenda yOmakwatho gOpaveta (Legal Assistance Centre) olye shi mono mo kutya omahepekathano gomomagumbo oge lile po unene oshititano shimwe shomomiyonena adhihe hadhi ningwa moNamibia.

**Iipotha yOmahepekathano gOmagumbo ya lopotwa kOpolisi yaNamibia:
Omaukwatya goshipotha nEyamukulo lyOpolisi, 1999.**



OMITOTOLOMBO KOMBINGA YOMAHEPEKO GOMOMAGUMBO

- **Omahepekathano momagumbo ogi indjipala.** Ehangano lyUundjolowe le mUuyuni otali tengeneke kutya etata lyaakiintu ayehe muuyuni oya tsakaneka iihuna palutu kaaholike yawo. Omuyalu nguka ogwa londa pombanda ishewe miilongo yimwe.
- **Omahepekathano momagumbo oge li ompinge noveta.** Omahepekathano gomomagumbo oge li ompinge nEkotampango lyaNamibia. Otaga yonagula wo ooveta dhiikulumuna dhoka dhi li po ngaashi dhoka dhokudhenga nonyanya nehepeko lyaanona, dhoka wo dha kwatelwa mo mOveta yOkukeelela Omahepekathano gomomagumbo. Iihuna yomomagumbo oya ekelwahi wo pamatsokumweuvathano gopaigwana ngoka ga shainwa kuNamibia – ngaashi Euvathano li nasha nOkuvudha mo Omaludhi agehe gOshipungo tashi ningilwa Aakiintu.
- **Omahepekathano momagumbo oga nika oshiponga koshihakanwa.** Iihuna yomomagumbo ohayi vulu okwechameka iihakanwa yayo palutu, pamadhladhilo, painiwe nopankalathano. Oshihakanwa ohashi vulu okuyehamekwa unene nenge okusa nokuli, oshowo omaupyakadhi gopamadhladhilo. Uwehame hau etithwa komahepekathano momagumbo owa dhiginina unene wu vulithe mboka wa ningwa komuheni. Iihuna yopamadhladhilo nopamaiyuvu ohayi vulu okuyonagula lela naana ngaashi iihuna yopalutu.
- **Omahepekathano gomomagumbo oga nika oshiponga kaanona mefamili.** Aanona ya putukila mefamili/egumbo lyuukolokoshi ohaya vulu okutsakanekwa komaupyakadhi gomaihumbatonayi nomaiyuvu omadhigu, nonando tashi vulika inaya tsakaneka omahepeko ngoka meukililo. Ohayi ilongo wo kutya iihuna oyo omukalo gokukandula po omaupyakadhi, shoka tashi indjipaleke wo ondondo yiikulumuna moshigwana.
- **Iihuna yomomagumbo oya nika oshiponga komuhepeki ye mwene.** Omuhepeki ohashi vulika a kanithe esimaneko lyefamili/aanegumbo lye oshowo eisimaneko-mwene. Ohashi vulika a kambadhale okufutula po omaiyuvu ge ngoka gohoni nokwaaihwapo nuukolokoshi gwa gwedhwa po, nenge a ninge ombwigi yiikolitha.

- **Iihuna yomomagumbo oya nika oshiponga kefamili.** Omahepekathano momakwatathano ohaga tana ethimbo nethimbo. Olundji ohaga ka etelela etekopo thilu lyondjokana.
- **Iihuna yomomagumbo oya nika oshiponga koshigwana.** Ohayi vulu okugeyeka aanegumbo yalwe oshowo aashiinda. Ohayi gandja wo oshiholelwa oshiwini kaanona pomukunda/moshigwana. Ohayi vulu okuningitha aakiintu moshigwana ya kale neiyuvo lyokumbandamekwa.
- **Iihuna yomomagumbo oya nika oshiponga koshigwana ashihe.** Ohayi etitha ombepo yakwalukehe yokwaasimaneka aakiintu. Ohayi vala wo ondondo yiikulumuna oyindji moshigwana, pakulonga aanona kutya elongitho lyoonkondo olya taambiwa ko. Iizemo yomahepekathano oya kwatela mo elondo lyiifuta yepangelo kuunamiti, eindjipalo lyiikulumuna nomahepekathano, omaupyakadhi gopankalathano ngaashi uumbwigi wiikolitha niingamithi oshowo ekanitho lyiilonga tayi eta po sha moshigwana. Pamukalo nguka, iikulumuna nomahepekathano otayi shunitha pevi omahumokomeho goshigwana.
- **Iihuna yomomagumbo omukundu gwa yama kuukakwashike-ko-kantu.** Nonando aalumentu ohaya vulu wo okuninga iihakanwa yomahepeko gomomagumbo, iihuna oyindji ohayi ningwa kaalumentu taye yi ningile aakiintu. Aakiintu olundji oye li moshiponga shomahepeko kaalumentu mboka ye ya shi.

Onda hala okumona ekwatho
opo ndi ilonge okukondolola ongeyo
yandje. Ohandi kala nokudhiladhila
kutya okudhenga omukulukadhi gwandje
ohashi pe ndje eiyuvo lyuunankondo, ihe
ohashi uvitha ndje nayi shi nasha nangame
mwene meni lyandje.



Oveta yomahepekathano oya pumbiwa noonkondo, osho aaniilonga yopankalathano taya ti.

OSHAKATI... Aaniilonga yopankalathano oyi itaala iizemo yomahepekathano gomomagumbo momutungilo gwefamili, ihaga teyagula po ashike efamili, ihe nomutungilo gopankalathano. Omahepekathano gomomagumbo nelongithonayi, otaya ti, ohashi etitha elongithonayi lyiikolitha niingamithi, omaidhipago, ehepeko lyaanona, nomaupyakadhi gethimbo ele paendunge nomadhiladhilo oshowo ethigopo lyosikola. “Otwa adhika keiyuvo kutya osha simana okutumbula kutya oshitya iihuna yomomagumbo inashi uvika ko nawa koyendji. Kakele, eihumbato lyomahepekathano olya kwatela mo elongithonayi pamulalo, oshimaliwa nomaiyuvo,” osho aaniilonga yopankalathano taya ti. Taya tsu omuthindo kutya elongithonayi pamulalo, pashimaliwa nopamaiyuvo ohayi yonagula wo nokushundula omutungilo gwefamili.

The Namibian, 26 Novomba 2002

(ekundaneko lyoshigongi shomumvo 2002 shAaniilonga nAakwatheli yOpankalathano sha ningilwe mOndangwa)

EHEPEKO LYOKANONA

- Ehepeko lyokanona ohali vulu okuningwa palongithonayi paihulo, pamadhladhilo noshipungo.
- Omahepeko ogendji gopaihulo kaanona ohaga ningwa kaanegumbo yokanona.
- Aalumentu naakiintu ayehe ohaya vulu okulongitha nayi aanona paihulo, ihe aahepeki oyendji yaanona oyo aalumentu.
- Aamati naakadhona ayehe ohaya vulu okutskaneka elongithonayi paihulo mefamili/megumbo, ndele iihakanwa oyindji oyo aakadhona.
- Aalumentu mboka haya hepeke aakiintu momagumbo olundji ompito oya eguluka okukala wo aahepeki yaanona.

Omahepekathano taga ningilwa aaholike ohaga holoka konyala miilongo ayihe, momithigululwakalo adhihe oshowo pondondo kehe yoshigwana pwaa na eyooloko, nonando iigwana yilwe yi na iihuna yomahepekathano gaaholike yi vule iikwawo...

Nonando aakiintu ohaya vulu okuningila aalumentu yawo uukolokoshi, omahepekathano ohaga holoka wo pokati kaaholike yomashenge, egwililopo lyomotengi gomahepekathano gaaholike ogwa taalela unene aakiintu taye ga ningilwa kaalumentu. Aakiintu okuza 10 sigo 70 okwa lopotwa ya dhengwa palutu kaaholike yawo aalumentu moonkalamwenyo dhawo. Muuyuni auhe, iiningwanima mbyoka tayi tsitsimike omahepekathano momakwathano gokahetengi oyi li pombanda. Oya kwatela mo okwaavulika nenge okutamanana nomulumentu, oku mu pula kutya iimaliwa oyi li peni, okwaateleka iikulya pethimbo, okwaasila omaluvalo oshimpwiyu nenge egumbo. Okutindila mukwawo omulalo/ondjugo nomulumentu a fekele omukiintu okuya miihulo nomulumentu gulwe. Aakiintu olundji oya kakatela momakwatathano ngaka omawineyi omolwiiyemo iishona nonkalo yoluhepo. Aakiintu oye li iihakanwa yelongithonayi kaaholike yawo miigwana moka mu na okwaanuuthikepamwe pokati kaalumentu naakiintu, iinakugwanithwa yopaukakwashike-ko-kantu tayi tengele ombinga yimwe, iinima ya guma omuthigululwakalo noohedhi dhoka tadhi popile uuthemba womulumentu a lale nomukiintu gwe nando ke na omaiyuvo giipala, oshowo omangambeko ga nkundipala okuya moshipala eihumbato ndyoka.

Inima mbika ohayi dhigupaleke omukiintu kaa thige po ekwatathano lyiihuna. Okuthiga po ekwatathano lyomahepeko itashi mu shilipalekele egameno. Iihuna omathimbo gamwe otayi tsikile nohashi vulika nokuli yi etithe edhipago lyomukiintu.

Omusimanekwa Libertine Amathila, Ominista yUukalinawa nIlonga yOpashigwana Oompata mOparliamende kombinga yOveta yOkukeelela Omahepekekathano mOmagumbo.

EFATULULO LYIITYA YOPAVETA

NAKUNYENYETA – omuntu ngoka ha tsakaneke ehepeko megumbo

OMUNINGI GWEINDILO – omuntu ngoka a ningi eindilo lyelombwelo a gamenwe paveta.

Olundji shika ohashi ningwa komunyenyeti, ihe ohashi vulika wo omuntu gulwe a kalele po omunyenyeti ngaashi omunegumbo, kuume nenge omuniilonga gopankalathano.

OMUTAMANEKWA – omuntu ngoka a tulilwa mo oshipotha shelombwelo lyegameno lyopaveta.

Omuntu ngoka oye ihe nduno ta fekelwa kutya oye a ninga omuyonena – ehepeko megumbo.

AASILWASHIMPWIYU – aanona nenge aanegumbo yalwe mboka ihaya vulu okwiiyambidhidha yoyene nohaya silwa oshimpwiyu painiwe kunakunyenyeta nenge omutamanekwa

EKOLEKO – omushangwahokololo pambapila moka omuntu ta gana kutya oshili, nokwiilongekidha gu longithwe onguumbangi mompangu

OKWIITHANWAKOMPANGU – elombwelo okuholoka komeho gompangu



ELOMBWELO LYEGAMANE LYOPAVETA/EUTHOVETA LYEGAMENO – euthoveta lyompangu tali utha omutamanekwa a hulithe po okuninga omahepeko megumbo

Elombwelo lyegameno lyopaveta/euthoveta lyegameno ohashi vulika li kwatele mo uutendo yokugamena nakunyenyeta, ngaashi okuutha kutya omutamanekwa ina hedha nando popepi nanakunyenyeta, nenge okulombwela omutamanekwa a thige po egumbo moka ya kala ayehe nenge okuutha omutamanekwa a gandje oshimaliwa shosapota.

Oshitopolwa 1


Membo ndika, otatu ka tala unene kunakunyenyeta “ongomukiintu” nomutamanekwa “ongomulumentu.” Otwa tseyi kutya aakiintu ohaya vulu wo okuninga iikulumuna naalumentu ohaya vulu okuninga iihakanwa, ndele otatu ka longitha elaka ndjoka tayi opalele moonkalo dhoka hadhi holoka unene. **Oveta yOkukeelela Omahepekathano mOmagumbo otayi thikitha pamwe uukakwashike-ko-kantu, notayi vulu okulongithwa okugamena aalumentu nenge aakiintu, oshowo aanona yuukakwashike-ko-kantu ayehe.**

Moshigwana shetu omu na omukithi gokankela, okankela yomahepekathano gomomagumbo.....

Omusimanekwa Schimming-Chase


Oompata mOparliamende kombinga yOveta yOkukeelela Omahepekathano mOmagumbo.

OKUGULU KOMAHEPEKATHANO



Okugulu kOmahepekathano otaku ulike nkene elongithonayi palutu nopaihulo li na ekwatathano nomaludhi omakwawo goonkondo nekondololo momakwatathano gopaumwene. Omaludhi gamwe omashona gekondololo ohaga vulu okufala mehepeko lyopalutu nenge iihuna yopalutu ya fa ko.

OKUGULU KONKALO YAA SHI YOMAHEPEKATHANO



Okugulu kOnkalo yaa shi yomahepekathano otaku ulike omaihumbato ga kankamekwa kuuthikepamwe shi vulithe elongitho lyoonkondo. Otaku gandja iiyetwapo okutula po iilalakanenwa noongamba momakwatathano gopaumwene.

EHEPEKATHANO LYOMEGUMBO OSHIKE?

Eihumbato tali landula olya talika ko ehepekathano lyomegumbo Paveta ngele ohali ningwa mekwatathano lyomegumbo. Efatululo lyekwatathano lyomegumbo otali ka yelithwa moshitopolwa tashi landula.

1. Ehepeko kolutu, mwa kwatelwa mbika

- okudhenga nenge elongitho kehe lyoonkondo tali ningilwa nakunyeneyeta, ngaashi okudhengwa nenge okuthangwa
- okungambekwa nenge okweedhililwa koonkondo, ngaashi okupatela nakunyeneyeta mondunda, nenge okutindila nakunyeneyeta a ye kiilonga
- okulya oshipungo nakunyeneyeta kaa mone iikulya, omeya, iikutu nenge evululuko, ngaashi okupatela nakunyeneyeta pondje yegumbo.

2. Ehepeko paihulo, omwa kwatelwa

- okuthiminikila koonkondo omuntu mekwatathano lyopamulalo
- okulongitha eihumbato lyopamulalo ndyoka tali hepeke nakunyeneyeta, tali mu shundula nenge oku mu yuga uuntu womuntu. Oshiholelwa sheihumbato ndika ongaashi omulumentu ta kwata omukulukadhi gwe komagundji montaneho yaanegumbo nokupopya nayi shi nasha nomagundji ngoka omanene nenge omashona
- okuninga omuntu ongoshilongithwa shopaihulo, ngaashi iifo yomathano giuhulo nenge epandja lyopaintaneta, ngoka taga ulike iihuna, iisithahoni nenge eshundulo lyuuntu womuntu
- okulongitha eihumbato lyopaihulo tali sitha ohoni, iihuna nenge eshundulo nenge okuya miihulo nomuntu ngoka e na ekwatathano pamaiyuvo nanakunyeneyeta, ngaashi omunegumbo lye nenge kuume kopothingo. Oshiholelwa, omulumentu ota ningile omuholike-kadhona gwe omahepeko. Ngele oha thiminikile omunakadhona omulumentu gulwe a ka tale naye okino yomathano giisithahoni

3. Ehepeko paliko, olya kwatela mo

- okutindila nakunyeneyeta iinima nenge oshimaliwa pwaa na omatompelo mbyoka a pumbwa opo a vule okulumba, iinima mbyoka e na okulongitha nenge e na uuthemba wopaveta oku yi longitha. Iiholelwa oya kwatela mo okutindila omuntu iikulya, okulongitha oshihauto shefamili a ye kiilonga nenge oku mu tindila iiniwe ye mwene
- okulanditha po omaliko, oku ga hanagula po pwaa na omatompelo, okuteyagula po iinima mbyoka nakunyeneyeta e na nayo nenge ha vulu oku yi longitha. Oshiholelwa okuteyagula po oradio yefamili nohamala opo nakunyeneyeta kaa vule okupulakena oonkundana
- okuholeka po omaliko ngoka nakunyeneyeta e na nago nenge kwa tegelelwa e ga longithe nenge ngele hasho okukelela nakunyeneyeta a longithe omaliko ngoka. Oshiholelwa okupatela mo omuzalo gwiilonga gwanakunyeneyeta ongomukalo goku mu keelela a ye kiilonga.

4. **Omatilitho.** Shika ohashi ningwa nelalakano okutilitha nakunyeneyeta, nenge a kale a tila oshilyo shimwe shomefamili nenge omupambele/omusilwashimpwiyu, pakuninga ngeyi
 - okutilitha okuhepeka palutu nakunyeneyeta
 - okuhepeka kolutu, nenge okuninga etilitho, oshilyo shefamili nenge omusilwashimpwiyu gwanakunyeneyeta
 - okuulika iilwitho, nenge eihumbato kehe tali tilitha. **Oshiholelwa okutula aluhe ombele poshitaafula omanga wa tala onkondolola nakunyeneyeta pamukalo guutondwe.**
5. **Okuhindana/Omagandambadhi.** Shika omukalo hagu endululwa nenge okupopya nanakunyeneyeta, oshilyo shefamili nenge omusilwashimpwiyu gwanakunyeneyeta pamukalo kagu li nawa. Okuhindana okwa kwatela mo
 - okutala nayi omuntu nenge okuhedha unene popepi naye
 - okudhengela omuntu ongodhi, mwa kwatelwa oongodhi itadhi popi sha
 - okutumina oombilive, email nenge iinima nenge omatumwalaka.

Oshi li omuhindo ngele nakutamanekwa okwa longitha omuntu gulwe a katuke oonkatu dhoka.
6. **Ekaulonyanga, ngaashi**
 - okuya megumbo nenge meliko lyana kunyeneyeta, pwaa na eziminino lye, uuna nakunyeneyeta nanakutamanekwa ihaya kala megumbo limwe.
7. **Ehepeko pamaiyuvo, pakana nenge paendunge.** Shika osha kwatela mo eihumbato “lyeshundulo” nenge “esithohoni” tali ningilwa nakunyeneyeta, oshilyo shefamili lye nenge omusilwashimpwiyu gwanakunyeneyeta, ngaashi
 - okutukagulwa nenge okweehameka pamaiyuvo. **Oshiholelwa omusamane ta pula omukulukadhi gwe a taambe ko nyaankwawo/ohonda yomusamane gwe a lale nayo mondjugo nenge mombete yawo**
 - euliko lyuukodhi lya dhiginina nenge eihumbato lyekodhililo tali ningilwa nakunyeneyeta, aasilwashimpwiyu ye nenge aanegumbo. **Oshiholelwa omulumentu ngoka ha tindile suwala ye gomukadhona ngoka e li megumbo lyomusamane nomukulukadhi kaa ninge nando ha talele po ookuume ke nenge ye mu talele po.**
8. **Omambandameko nenge oonkambadhala okukatuka yimwe yomoonkatu dhoka oshi li ehepeko lyomegumbo.** **Oshitsa shika osha simana. Inashi pumbiwa u tegelele sigo wa dhengwa opo u ka konge ekwatho kompangu. Eyehameko lyembandameko olya gwana u katuke onkatu.**

Oontamanana dhanathangwa nomatukano ngoka haga holoka ethimbo nethimbo momakwatathano agehe gefamili kage SHI omahepeko gomomagumbo. Egandjombedhi nezulo lyaanona pamukalo gu shi okuuvika ko KASHISHI omahepeko gomomagumbo. Omahepeko gomomagumbo osho eihumbato ndyoka tali etitha uuwehame lela kolutu, painiwe, pamaiyuvo nopaendunge. Aantu mboka haya fala oondjuma dhanathangwa dhefamili kompangu ohaya shunithwa ko.



Okuza momaludhi ogendji gomahepeko gomomagumbo, oshiningwanima shimwe awike osha gwana okuyukipalitha eindilo lyegameno lyopaveta.

Kakele ashike komuhindo nehepeko paendunge ohayi pula okugandja oshiholelwa shehwata lyiiningwanima oyindji. Iiningwanima yanathangwa mbyoka itayi talika ko kuyo omiyonena ohashi vulika yi ninge omahepeko gomegumbo ngele oyi li oshitopolwa shehwata lyeihumbato lyakehe esiku.

Oshiholelwa, andola omulumentu oha kutha mo ondjembo ye noku yi tula pepandja mOmbimbeli yefamili, mpoka pwa nyolwa omaso gaanegumbo, omanga a tala omukulukadhi gwe pamukalo tagu tilitha. Omusamane ita popi sha, ndele ota shilipaleke kutya omukulukadhi gwe okwe mu tala pethimbo ndyoka. Oshinima shika ohe shi ningi konyala ongulohi kehe. Okutula ondjembo kombanda yOmbimbeli itashi tilitha unene, ihe ngele owe shi talele meihumbato lyomuntu, nena otashi tilitha noonkondo.

Oshitopolwa 2



OKUTALITHA AANONA OMAHEPEKO

Osho oludhi lwomahepeko gomomagumbo okupitika okanona ka tale ehepeko tali ningilwa oshilyo shefamili palutu, paihulo nenge paendunge, nenge okutula okanona moshiponga shokupulakena nenge okutala omahepeko. Ihe oshihakanwa shehepeko kashi na okukwatelwa mo mushika, ihe nakushininga oye ashike e na ondjo.



Oshiholelwa, andola okanona oha ka yi kosikola esiku kehe taka lili, oshoka oka uva omainyengo gahe ta dhenge yina uusiku mondunda yawo yokulala. Omulongiskola ota vulu oku ka kwatha ka mone elombwelo lyegameno lyopaveta omahepeko ngaka ga hulithwe po. Yina oye oshihakanwa shiihuna mbika yomegumbo pamukalo gokuhepekwa kolutu, ihe okanona oke li wo oshihakanwa shomahepeko gomegumbo, oshoka he oku shishi lela kutya ota tula okanona monkalo moka ke uvite lela shoka tashi ningwa megumbo.

Oshitopolwa 2(2)

EKWATATHANO LYOMEGUMBO OSHIKE?

Omakwatathano taga landula mpaka ogo “omakwatathano gomegumbo” pauvoko lyOveta yOkukeelela Omahepeko gOmomagumbo:

1. **ondjokana**

- ondjokana yopashigwana nenge pamuthigululwakalo
- ondjokana ndjoka opo ashike ya hulu
- eyalekathano nelalakano okuhokanathana.

2. **okooteekathana** (omulumentu nomukiintu haya lumbu pamwe ongomusamane nomukulukadhi ihe inaya hokanathana.)

- ehotekathano lyethimbo ndyoka
- ehotekathano ndyoka opo lya hulu

3. **aantu yaali mboka oyo aavali yokanona**

- omulumentu nomukiintu mboka ye na okanona pamwe, kutya nee oya hokanenathane nenge oya lumbile pamwe
- omulumentu nomukiintu mboka ya tegelela okanona kawo ka valwe, kutya nee oya hokanene nenge ya lumbile pamwe.

Monkalo moka aantu yaali oyo aavali yokanona, ohaya vulu okuya pamwe molwiinima ya guma okanona – ngaashi omuvali gumwe ta pula iifuta yosapota kumukwawo.

Oveta itayi longo moonkalo moka okanona ka valwa sha ziilila mekwatonkonga, ngele kape na we ekwatathano limwe lyopaumwene pokati komulumentu nomukiintu.

4. **Omuvali nokanona**

Shika osha kwatela mo aavali naanona mboka ya tekulwa (monkalo moka okanona ka tekulwa paveta/pambelewa).

Aavali naanona yawo otaya tsikile okukala nekwatathano lyopaupambele moonkalamwenyo dhawo adhihe, nonando konima aanona oya ka ninga aakuluntu.

5. **Iilyo yefamili yi na ekwatathano lyontumba lyopaupambele**

- iilyo ayihe yefamili ya pambathana pambinzi, pandjokana nenge pakutekulwa, shampa ashike pe na ekwatathano lyontumba lyopaupambele mokati kawo, ngaashi eyambidhidho lyopashimaliwa nenge okukala megumbo limwe.

Shika osha kwatela mo aantu mboka tashi vulika ya ka ninge aanegumbo ngele aaholike yaali ya otekathana oya hokanathana. Oshiholelwa, ngele omulumentu nomukiintu ohaya lumbu pamwe megumbo lyaavali yomulumentu, nenge ngele aavali yomulumentu ohaye ya yambidhidha pashimaliwa, nena ayehe oye na ekwatathano lyopaupambele waanegumbo.

Aakwanezimo moNamibia ohaya vulu ya kale oyendji nohashi vulika nee aantu ya pambathane pambinzi nenge pandjokana pwaa na etseyathano nawa lela. Oveta yOkukeelela Omahepekathano gOmomagumbo oya totwa po okutala koonkalo moka aantu ye na ekwatathano lela lyontumba moonkalamwenyo dhawo dhesiku kehe, oshoka omahepeko moonkalo dhika oge na omakitakano gi ikalekelwa. Nomolwaashoka aakwanezimo ayehe inaya kwatelwa mo mongundu “lyiilyo yefamili”, ndele aapambele awike mboka ye na ekwatathano lyomegumbo lyontumba.

6. Omuholikemati – omuholikekadhona

- aantu kehe yaali yayoolokathana paukakwashike-ko-kantu mboka ye na nenge ye li mekwatathano lyopahole.

Inashi pumbiwa okuulika ekwatathano lyopaihulo. Ekwatathano lyuupambele mbuka ohali holoka po nonando omuholikemati nomuholikekadhona opo ashike ya tameke ‘okukongathana – okuya mohole’.

Inashi pumbiwa kwaayehe yaali ya zimine kombinga yuukwatya wekwatathano lyawo. Oshiholelwa, omukadhona otashi vulika e shi mone mo keihumbato lyomumati kutya oye na ekwatathano lyopahole, nonando omumati oha ti ngoka ke shi nando okakadhona ke.

Molwaashoka omathimbo gelunduluko ohaga vulu okunika oshiponga unene oku shi talela momahepekathano gomomagumbo, “ekwatathano lyopaupambele”, onkee elalakano lyOveta otali tegelele kutya ekwatathano lyaantu yaali li hule po konima yoomvula mbali (ngaashi ehengathano nenge etopoko). Ngele aantu yaali oye na okanona, “ekwatathano lyuupambele” wawo otali tsikile monkalamwenyo ayihe yokanona nenge uule woomvula mbali konima yeso lyokanona. Ompangu oyi na oonkondo okutala ko ‘ekwatathano lyuupambele’ onga tali tsikile shi vulithe mpoka, ngele ope na omatompelo omawanawa oku shi ninga.

Oshiholelwa, ngele omuholikemati nomuholikekadhona oya topoka, ndele ohaya tsakanene paempito molwaashoka ohaya hiti posikola yimwe. Omumati oha tsikile nokupula omukadhona ya galukilathane, ihe omukadhona oha tindi. Ohashi vulika shi mu geyithe sho omukadhona ha tindi aluhe oku mu galukila. Ompangu otashi vulika yi shi mone mo kutya “ekwatathano lyuupambele” monkalo ndjika otali tsikile shi vulithe poomvula mbali, ngele eihumbato lyomumati otali tsikile.

Ethaneko okulepeka oveta yi tale oonkalo.

Onda li tandi dhiladhila kutya otandi vulu okufadhuka po omiyonena ngele otwa hengathana. Ondi na omuholikemati gwandje omupe, ihe omusamane gwandje ngoka twa hengathana naye okwa tameka ishewe okuningila ndje omatilitho. Oha kala ashike ta ti kutya ngele aniwa ke na ndje, kape na we omulumentu gumwe ta vulu okukala nangame.

Ou na okukala wa kotoka! Omusamane ngoka mwa hengathana naye ota kambadhala oku ku kondolola. Aalumentu yamwe ohaya vulu okuninga aakolokoshi unene ngele omukiintu okwa kambadhala oku mu etha po.

Moka aantu ye li
moshiponga
shokuningilwa
omiyonena
omolwomakwatathano
guupambele
gomonakuziwa.

Oveta INAYI kwatela
mo omakwatathano
gopahole pokati
komashenge.

Shika otashi ti
aantu mboka ye li
momakwatathano
gopaushenge moka
mu na omiyonena
itaya vulu okulongitha
Oveta yOkukeelela
Omahepekathano gOmomagumbo.

Onda li tandi dhiladhila
kutya otandi vulu okufadhuka po
omiyonena ngele otwa hengathana.
Ondi na omuholikemati gwandje omupe,
ihe omusamane gwandje ngoka twa
hengathana naye okwa tameka ishewe
okuningila ndje omatilitho. Oha kala
ashike ta ti kutya ngele aniwa ke
na ndje, kape na we omulumentu
gumwe ta vulu okukala nangame.

Ou na okukala wa kotoka!
Omusamane ngoka mwa hengathana
naye ota kambadhala oku ku
kondolola. Aalumentu yamwe ohaya
vulu okuninga aakolokoshi unene
ngele omukiintu okwa kambadhala
oku mu etha po.



Oshitopolwa 3

OKUTALA KOMBINGA YOVETA

OSHIKE TO VULU OKUNINGA PO NGELE OWA TSAKANEKE OMAHEPEKO GOMOMAGUMBO?

Omuntu kehe ngoka a tsakaneka omiyonena nenge omatilithe gomahepeko mekwatathano lyomegumbo/lyuupambele ota vulu okuninga iinima tayi landula mpaka:

1. Oto vulu okuninga eindilo lyelombwelo **lyegameno lyopaveta**.

Elombwelo lyegameno lyopaveta oyo euthoveta lyompangu tali utha kutya omuhepeki na hulithe po eihumbato lyomiyonena, na kale kokule naantu mboka ta hepeke, nenge noku li a thige po egumbo lyefamili/egumbo lyawo. Okwaavulika keuthoveta lyelombwelo lyegameno lyopaveta osho ekaulonyanga/epogolo. Omukalo gweindilo omupu noonkondo. Ino pumbwa omukalelilpo gopaveta/hahende. Omuniilonga gopankalathano nenge omunambelewa gompangu nenge omuntu gwontumba pomukunda gweni ota vulu oku ku kwatha okuudhitha ofoloma yeindilo.

2. Ngele ehepeko olya ningi oshikulumuna/epogolo (ngaashi okukdhenga nenge okutsuwa shoka shi li onkambadhala yedhipago), oto vulu okutulitha mo oshipotha nopolisi **NENGE** u pule opolisi yi pe omuhepeki elondodho lyopaveta/pambelewa.

Ope na omalandulathano gowina okuninga oshipotha oshipu kiihakanwa yomahepeko gomomagumbo. Oshiholelwa, oshihakanwa osha pitikwa okugandja omadhiladhilo ge ngele nakufekelelwa ehepeko na pewe ombooloha. Ngele ope na egeelo lyontumba, oshihakanwa oshi na uuthemba okugandja omadhiladhilo ge kutya egeelo linipo li na okugandjwa. Ope na oompango dhowina tadhi indike enyanyangidho lyomadhina giihakanwa yomiyonena dhomahepeko gomomagumbo, okugamena oshiholekwa shefamili. Ngele ino hala okutula mo oshipotha, peha lyaashoka oto vulu okupula opolisi yi gandje elondodho lyopaveta komuhepeki.

3. Oto vulu wo okuninga iinima ayihe iyali poshikando shimwe.

Otashi vulika u kale moshiponga ngele owa tula mo oshipotha nopolisi, ndele omuhepeki ta pewa ombooloha. Oto vulu okupula euthoveta lyegameno pethimbo oyo tuu ndyoka, li kwatelwe momalombwelo gomboolohazomolwegameno lyoye.



Onkatu yopashigwana

Onkatu yoshipotha

NENGE AYIHE IYALI

OMALOMBWELO GEGAMENO

OLYE TA VULU OKUPEWA ELOMBWELO LYEGAMENO LYOPAVETA?

- Omuntu kehe ngoka a hepekwa nenge ha ningilwa omatilitho mekwatathano lyomegumbo.

Okanona (omuntu ye li kofi yoomvula 21) otashi vulika a ninge eindilo pwaa na ekwatho lyomukuluntu miipotha moka omiyonena dhi na uukwatya wa dhiginina.

- Oshilyo shefamili, omunambelewa gopolisi, omuniilonga gopankalathano, omupangi, omulongiskola, omuwiliki gopashigwana, omuwiliki gopambepo, omugandji gwiilonga, omuhungimwenyo, nenge kehe omuntu ngoka e na eitulomo monkalonawa yomuntu ngoka ta mono iihuna komiyonena dhontumba.

Omuntu ngoka oye lela a mona iihuna yomiyonena na gandje eziminino pamushangwa uuna eindilo te li ningilwa komuntu gulwe, okuninga shila nakuhepekwa:

- omushona (e li kofi yoomvula 21)
- omuntu kee li nawa momutse
- omuntu ngoka kee shi mpoka e li
- omuntu ngoka aluhe ha kala a kolwa nenge ha longitha iingangamithi nenge
- omuntu ngoka e li moshiponga sheyehameko enene noonkondo opo ashike ompangu tashi vulika yi zimine eindilo lyomuntu ngoka pwaa na eziminino lye.

Omuntu ngoka ta ningi eindilo lyelombwelo lyegameno lyopaveta oha lukwa omuningi gweindilo. Omuntu ngoka a tsakaneka omiyonena dhomegumbo oha lukwa nakunyenya.

Omuningi gweindilo nanakunyenya ota vulu okukala ashike omuntu gumwe (uuna omuntu ye mwene oye ta ningi eindilo lyelombwelo lyegameno lyopaveta) nenge aantu yayooloka (uuna eindilo tali ningwa komuntu gulwe pehala lyamukwawo).

Oshitopolwa 4

ELOMBWELO LYEGAMENO LYOPAVETA OTALI VULU OKUNINGILWA LYE?

Elombwelo lyegameno lyopaveta otali vulu okuningilwa omuntu kehe e li mekwatathano lyopaupambele nanakunyenya. Omuntu ngoka ta tulilwa mo elombwelo lyegameno lyopaveta ohaku tiwa omutamanekwa.

Oshitopolwa 4

EINDILO LYELOMBWELO LYEGAMENO LYOPAVETA OTO VULU OKU LI NINGA PENI?

Oto vulu okuninga eindilo ndika kompangu yamengestrata yi li popepi nangoye:

- ehala mpoka nakunyenya ha kala nenge ha longele
- ehala mpoka omutamanekwa ha kala nenge ha longele
- ehala mpoka ehepeko/omuyonena gwa ningilwa.

Omuningi gweindilo oha vulu okuhogolola. Ompangu otayi vulu okupulakena oshipotha nonando nakunyenya nenge omutamanekwa opo ashike a tameke okulumba nenge okulongela moshitopolwa moka mu na ompangu – kape na ongamba kutya omuntu oku na okukala megumbo ethimbo li thike peni. Shampa ashike elombwelo lyegameno lyopaveta lya gandjwa, nena otali yi miilonga moshilongo ashike.

Oshiholelwa, ngele elombwelo lyegameno lyopaveta olya gandjwa mompangu moRundu, nomutamanekwa okwa tambukila kOvenduka, elombwelo lyegameno lyopaveta natango oli na oonkondo oku mu tamaneka sho e li kOvenduka.

Oshitopolwa 5

UUNAKE TO VULU OKUNINGA EINDILO LYELOMBWELO LYEGAMENO LYOPAVETA?

Ethimbo kehe. Omaindilo gelombwelo lyegameno lyopaveta oge na andola okutalika ko ongiinima yeendelela kompangu. Mengestrata ota vulu okuninga omatokolo shi nasha nomaindilo gomalombwelo gegameno lyopaveta nonando okonima yoowili dhompangu nenge momahuliloshiwike ngele osha pumbiwa.

Oshitopolwa 8(1) Ompango 2(5)

OLYE TE KE KU KWATHA OKUNINGA EINDILO?

Omunambelewa gompangu nenge omutamaneki mompangu moka oku na oku ku kwatha u longekidhe eindilo ngele owe mu pula. Oveta otayi ti kutya oshi li oshinakugwanithwa shawo.

Aantu oyendji yalwe otaya vulu wo oku ku kwatha u udhithe oofoloma dheindilo. Oto vulu wo okupula ekwatho komunambelewa gopolisi, omuniilonga gopankalathano, omukwanezimo nenge omuntu kehe we mu ineekele.

Oshitopolwa 6 (4)

OLYE U NA OKUPA EINDILO?

Ou na okugandja eindilo lyeuthoveta lyegameno komunambelewa gompangu yamangestrata.

Oshitopolwa 6 (6)

OMIKANDA DHINIPO DHILWE DHA PUMBWA OKUKWATELWA MO?

Ou na okugandja iinima mbika taya landula mpaka komunambelewa gompangu uuna to ningi eindilo lyelombwelo lyegameno lyopaveta:

- Ofoloma yeindilo ya udhithwa yi ihwapo.

Ofoloma ndjika yeindilo nayi kwatele mo omushangwahokololo tagu yelitha mo iitsa yi nasha nehepeko/ omuyonena. Omushangwahokololo ohagu ithanwa egano kutya shoka wa popya oshili, tashi ti kutya owa gana (omushangwahokololo oshili) to shi ningi montaneho yaKomufala gOkuganitha. Omunambelewa gompangu oye wo Komafala gOkuganitha. Popolisi kehe ope na Komufala gOkuganitha. Oto vulu wo okumona Komufala gOkuganitha moombaanga noombelewa dhopaveta.

Ngele ino hala omutamanekwa a tseye ondjukithi yegumbo lyaandjeni, oto vulu okuthiga po ondjukithi ino yi nyola mo mofoloma yeindilo

- Omikanda dhilwe okuyambidhidha oshipotha shoye, ngele otashi vulika.

Oshiholelwa, ngele oto vulu okutula mo omishangwahokololo tadhi yambidhidha okuza kaantu yalwe mboka ya tseysha kombinga yomuyonena/ehepeko, ngaashi aashiinda nenge iilyo yefamili/aanegumbo mboka ya uva nenge ya mona sho omahepeko taga ningwa. Oto vulu okutula mo okopi yekalata lyopaunamiti okuza komundohotola gwoye, nenge okopi yokakalata koye koshipangelo taka ulike omasiku wa li wa ka mona epango. Oto vulu okuninga eindilo nonando kape na omikanda dhika okuyambidhidha ofoloma yeindilo lyoye. Ihe mengestrata otashi vulika a ki itaale unene ehokololo lyoye ngele ope na omaumbangi ga gwedhwa po.

- Ngele oto ningi eindilo peha lyomuntu gulwe, ou na andola okukwatela mo ofomola yeziminino okuza kumwene goshipotha NENGE a udhithe oshitopolwa shofoloma yeindilo shoka tashi yelitha kutya omolwashike ofoloma yeziminino inayi pumbiwa.

Oonkalo moka eziminino inali pumbiwa odha yelithwa nale metetekelo pombanda.

- Ngele oto pula elombwelo tali indike omutamanekwa kaa ye mekwatathano nomuntu gulwe kee shi ngoye nenge okanona nenge omuntu gulwe e li metonatelo lyoye, nena ou na okukwatela mo eziminino okuza komuntu ngoka, li kwatelwe mo melombwelo lyokwaa ya mekwatathano nayo.

Inashi pumbiwa okukala nohahende opo u ninge eindilo lyelombwelo lyegameno lyopaveta. Oofoloma nomalandulathano omapu, noga yela nawa. Omuntu kehe ngoka e shi okulesha nokunyola Oshiingilisa/Oshiwambo ota vulu oku ku kwatha u udhithe ofoloma.

Kape na ofuto yasha okuninga eindilo lyelombwelo lyegameno lyopaveta.

Oshitopolwa 6, Ompango 2



OSHIKE HASHI NINGWA PO NGELE OWA GANDJA EINDILO LYOYE KOMUNAMBELEWA GOMPANGU?

Omunambelewa gompangu ota ka gandja eindilo kumengestrata. Mengestrata ota ka konaakona eindilo noku li tula miilonga mbala ngaashi tashi vulika.

Mengestrata ota ka ninga etokolo konima yokutala omauyelele ge li mofoloma yeindilo oshowo omikanda dha gwedhwa po.

NENGE

Mengestrata otashi vulika e ku pule omauyelele galwe omanga ina ninga etokolo, tashi vulika a pula omuningi gweindilo nenge omuntu gulwe e ye kompangu a yamukule omapulo gamwe ye mwene.

Mengestrata oku na uuthemba/oonkondo okuninga kehe shimwe shomiinima tayi landula mpaka:

- okuninga elombwelo lyegameno lyopakathimbo ngaashi sha pulwa
- okuninga elombwelo lyegameno lyopakathimbo ndyoka tali kwatele mo ashike oshitopolwa shoka sha pulwa
- okweekelahi eindilo lyelombwelo lyegameno molwashoka otali monika lyiifundja nenge omuntu ini itula mo.

NENGE

- okukala ina ninga etokolo sigo pwa ningwa omapulapulo moka mengestrata ta vulu okuuva uumbangi wanakunyenya oshowo womutamanekwa.

Oshitopolwa 8

Omumwamememati okwa geya unene noonkondo sho oongombe dha si koshekukuta. Okwa kala ashike ta tilitha ndje nokudhipaga ndje oshowo tate. Onde shi koneka kutya okwiitula mo shili.

Oto vulu okupula ompangu yi gandje elombwelo lyegameno lyopaveta tali ti kutya ina ya nando manga mekwatathano nangoye nenge tage gwoye, sigo a geyuluka. Oto vulu okuninga eindilo lyelombwelo lyegameno lyopaveta lyoye mwene, ihe oto ka pumbwa tate gwoye a shaine ombapila kutya okwa zimina naye wo a kwatelwe mo melombwelo lyegameno ndika lyopaveta.

ELOMBWELO LYEGAMENO LYOPAVETA LYOPAKATHIMBO

Mengestrata ota ka gandja elombwelo lyegameno lyopaveta lyopakathimbo ngele ope na uumbangi wolela mboka tau ulike kutya oshilonga (nenge etilitho) lyomahepeko gomomagumbo olya ningwa, shi ikwatelela kehokololo lyomuningi gweindilo.

Kape na elombwelo lyegameno lyopaveta tali ka gandjwa shi nasha noontamanana dhanathangwa nenge okapulukelume, okuninga shila iinima mbyoka yi li eihumbato lya nika oshiponga lela.

Mokutokola kutya iinima yinipo yi na okukwatelwa melombwelo lyegameno lyopaveta, mengestrata ota ka tala muule iitsa taya landula mpaka:

- omahepekathano gomegumbo oga kala ethimbo li thike peni
- omahepekathano gomegumbo ogoludhi lunipo (palutu, paihulo, paliko, nsht) oshowo kutya oga dhiginina shi thike peni
- ngele ope na oshiponga shomeendelelo kaantu nenge omaliko
- etaleko lyanakunyengeta shi nasha nedhiginino lyomuyonena
- ompumbwe okugamena uukalinawa, egameno nonkalonawa yanakunyengeta, aanona nenge aasilwashimpwiyu mboka tashi vulika ya gumwa.

Elombwelo lyegameno lyopaveta lyopakathimbo kali na oonkondo sigo lya (gandjwa pambelewa) komutamanekwa.

Ompangu otayi ka longekidha okopi yelombwelo ndyoka li na okupewa omutamanekwa kopolisi, omunambelewa gompangu nenge omutumwa gompangu. Elombwelo otali vulu okupewa omutamanekwa ye mwene, li thigwe pegumbo lye nenge pehala lyiilonga nenge li tumwe nombapila ya nyolithwa mopoosa. Epangelo otali ka futa iimaliwa ayihe yi nasha noshinima shika.

Oshitopolwa 7-9, Ompango 6



Opolisi oyi na oshinakugwanithwa okulongekidha egameno lyopolisi lyopakathimbo kunaninga eindilo sigo elombwelo lyopaveta lyegameno ya pu okulongekidhwa nokutseyithilwa omutamanekwa.

Oshitopolwa 8 (6)

Okupitila miikonga yelongo nepashulo lyoshigwana otashi vulika tu ka shilipaleke kutya oshigwana shokomongula shi ka tyapule onkalamwenyo yi na iikulumuna yi li pevi.

Omusimanekwa Kawana, Omupehaminista gUuyuuki
Oompata mOparliamende kombinga yOveta yOkukeelela
Omahepekathano mOmagumbo

OSHIKE HASHI NINGWA NGELE ELOMBWELO LYEGAMENO LYOPAVETA LYOPAKATHIMBO LYA GANDJWA?

Onkatu ya landula ko oyi ikwatelela kushoka omutamanekwa ta ningi po. Omutamanekwa oku na okutokola ngele ota ka tamaneka euthoveta ndyoka. Oku na okuninga etokolo omasiku ngoka ge li meuthoveta lyegameno lyopakathimbo inaga kwisha. Omasiku ngoka konyala naga kale 30 okuza esiku lyeuthoveta lyegameno lyopakathimbo lya gandjwa. Ihe opo shi kale pauyuuki komutamanekwa, omasiku ngoka ota vulu oku ga koya nomasiku 10 konima sho omutamanekwa a mono elombwelo lyopaveta lyegameno lyopakathimbo.

OMUTAMANEKWA OKU NA OOMPITO DHOPAALI:



Okupataneka elombwelo

NENGE

Okutaamba ko elombwelo

1. **Ngele omutamanekwa ota pataneke elombwelo:** Omutamanekwa oku na okutumina omunambelewa gompangu etseyithilo lyanathangwa tali ti kutya okwa hala okupataneka euthoveta/elombwelo, muule womasiku ga uthwa. Okuza mpoka otapu ka kala iihokolola mompangu haku tiwa omapulakeno, mpoka aantu ayehe yaali taya ka pewa ompito okuhokolola omahokololo gawo.

Esiku lyomapulakeno otali ka tulwa po. Esiku ndika oli na okukala muule womasiku 30 okuza sho omunambelewa gompangu a mono eyamukulo lyomutamanekwa. Omuningi gweindilo ota ka tseyithilwa esiku lyompangu andola muule woowili 24 kuye. Omapulakeno oge na okuningwa mbala ngaashi tashi vulika, ku shilipalekwe kutya omutamanekwa ita thindilwa kongudhi keuthovetalombwelo lyegameno lyopakathimbo.

Omutamanekwa ota vulu okupula ngele omapulakeno otaga vulu okuningwa kuye/mbala. Oshoka euthoveta lyegameno lyopakathimbo olya ningwa, ye ina pewa ompito okutya sha, notashi ka kala ashike pauyuuki okupitika omutamanekwa e ye kompangu pethimbo mpoka a gandje ehokololo lye. Ihe omuningi gweindilo oku na ashike etseyithilo lyoowili 24 dhi nasha nesiku lyomapulakeno.

Pomapulakeno, omutamanekwa ote ke ya kompangu a popye kutya omolwashike ta dhiladhila kutya euthoveta lyegameno lyopakathimbo inali ningwa elombwelo lyopaveta lya hugunina. Omuningi gweindilo naye wo okwa tegelelwa e ye kompangu esiku ndika, opo ompangu yi ka vule okukonaakono omahokololo gawo agehe yaali. Elandulathano lyomapulakeno olya yelithwa mo nawa pevi.

Euthoveta lyegameno lyopakathimbo otali kala noonkondo sigo ompangu ya manitha omapulakeno nokugandja etokolo lya hugunina.

2. **Ngele omutamanekwa ita pataneke euthoveta/elombwelo:** Ngele omutamanekwa INA gandjaetseyitho lyasha komunambelewa gompangu tali ti kutya oku li ompinge nelombwelo lyopaveta lyegameno lyopakathimbo, nena euthoveta lyegameno lyopakathimbo otali ningi ashike etokolo lya huguninwa pwaa na omaongaongo. Mengestrata oku na okushilipaleka kutya omutamanekwa okwa mona shili etseyitho lyelombwelo lyopaveta li nasha negameno lyopakathimbo, nokwa hogolola oku kala ine li pataneka. Ngele shika osha monika mo, nena mengestrata oku na okuninga elombwelo ndyoka lyegameno lyopaveta lyopakathimbo ongeuthoveta lyegameno lyahugunina.

Oshitopolwa 10-11, Ompango 7

OSHIKE HASHI NINGWA PONGELE MENGESTRATAINAGANDJAELOMBWELO LYEGAMENO LYOPAVETA LYOPAKATHIMBO?

Ngele mengestrata ina shilipalelwa ngele euthoveta lyegameno lyopakathimbo oli li pauyuuki, nena mengestrata ota ka lombwela omunambelewa gompangu a tseyithile omutamanekwa nomuningi gweindilo ye ye komapungu mesiku lyontumba omolwomapulakeno. Mengestrata ota ka pulakena ihe komahokololo gawo ayehe omanga ina ninga etokolo lyahugunina.

Ngele mengestrata ota dhiladhila kutya eindilo kali na ongushu, mengestrata ota ka ekelahi eindilo. Omuningi gweindilo ota vulu okuninga etalululo lyetokolo ndika kOmpangu yOpombanda.

Oshitopolwa 8(3), 18

OSHIKE HASHI NINGWA POMAPULAKENO?

Omapulakeno ogo omukalo gokuuva omahokololo agehe shi nasha neuthoveta lyegameno. Iihokolola mbika ihamu kala oshigwana/aantu yalwe. Aantu ashike mbaka taya landula mpaka taya vulu okukala po:

- aanambelewa yompangu, omuningi gweindilo, omunyenyeti (ngele omuntu nguka haye a ninga eindilo) nomutamanekwa.
- Oohahende/aakalelipo yopaveta (ngele oye ya na) oshowo oombangi dhawo.
- aantu ashike yaali taya yambidhidha omuningi gweindilo oshowo yaali yokombinga yomutamanekwa (ookuume, iilyo yofamili/aanegumbo, nsht.)
- omuntu kehe a uthwa kompangu.

Ope na omikalo ne hashi vulika kutya omapulakeno ga ye komeho, shi ikwatelela kutya oolye ye nasha noshipotha ya holoka po.

1. Ngele omutamanekwa ina holoka

Ngele omutamanekwa ina holoka, mengestrata ota vulu okuninga ngeyi:

- okugandja euthoveta lyegameno lyahugunina, shampa ashike omutamanekwa a li a tseyithilwa nawa shi nasha nomapulakeno.

NENGE

- okutsilika oshipotha nokugandja elombwelo komutamanekwa a shilipaleke kutya ote ke ya kompangu moshikando tashi landula. (elombwelo lyopaveta olyo omukanda gopaveta tagu utha omuntu a holoke komeho gompangu)



NAKUNYENYETA

2. Ngele omuningi gweindilo ina holoka

Ngele omuningi gweindilo ina holoka, mengestrata otavulu:

- okweekelahi oshipotha, ngele mengestrata oku na etompelo okwiitaala kutya omuningi gweindilo nenge omunyenyeti ina hala we okuya komeho noshinima/oshipotha

NENGE

- okutsilika oshipotha, ngele ope na etompelo lyongushu kutya omolwashike omuningi gweindilo ina holoka (pashiholelwa molwaashoka okwa li moshipangelo)

NENGE

- okuya komeho nepulakeno pakutala kuumbangi wanakuninga eindilo, nenge (ngele omutamanekwa okwa hala) nakuninga eindilo oshowo omuntu kehe a gandja uumbangi ye ye kompangu opo omutamanekwa a vule okupataneka omaumbangi gawo.

Ompangu otayi ka pula komanda gositaasi shopolisi yi li popepi opo shi monike mo ngele ope na omatilitho gwontumba taga ningilwa omuningi gweindilo. Ngele ope na omukundu, nena opolisi oyi na okugandja egameno lya pumbiwa.

3. Ngele omuningi gweindilo nenge

omutamanekwa kape na ngoka a holoka
Ngele omutamanekwa oku na etseyithilo lyomapulakeno lyolela, nena mengestrata ota vulu okuya komeho noshipotha ngaashi monomola onti-2 metetekelo.

4. Ngele omutamanekwa nokuningi gweindilo ayehe oya holoka

Ngele omutamanekwa okwe ya kompangu okupataneka euthoveta lyegameno, nomuningi gweindilo naye wo opo e li, nena mengestrata ota ka tsikila okutala oshinima. Mengestrata ota ka pulakena shoka ayehe yaali taya ti; omuningi gweindilo oshowo omutamanekwa. Mengestrata otashi vulika wo a ka tale komaumbangi ga gwedhwa po, ngaashi ehokololo lyoombangi nenge omishangwahokololo dhopaunamiti. Omuningi gweindilo oshowo omutamanekwa (nenge aakalelipo yawo yopaveta) otaya vulu okupulapula oombangi.

Oshitopolwa 12, Ompango 4 & 9



OMATSILIKO GIIHOKOLOLA

Ngele mengestrata okwa undulile komeho omapulakeno komasiku gokomeho omolwetompelo lyontumba, nena elombwelo lyegameno lyopaveta ndyoka lyopakathimbo otali kala miilonga sigo omapulakeno ga ningwa.

Ngele gumwe ina holoka kompangu sho mengestrata a undulile komeho omapulakeno, etseyithilo lyesiku epe lyomapulakeno oli na okupewa ngoka ka li po.

Oshitopolwa 12 (11), Ompango 8

EKALELOPO LYOPAVETA OLYA PITIKWA POMAPULAKENO?

Omuningi gweindilo oshowo omutamanekwa ayehe oya mangeluka okulongitha oohahende yawo, ndele elandulathano oli na andola okukala lyanathangwa kutya aakalelipo yopaveta itaya ka pumbiwa naana. Omapulakeno ge nasha nomahepekathano gomomagumbo oga faathana konyala nomapulakeno gompangu ge nasha nosapota pampito ndjika.

Oshitopolwa 12 (7), Ompango 4 (5)- 4(7)

Ngele omuntu gumwe nenge ayehe yaali kaye na oohahende, mengestrata oku na okushilipaleka kutya omapulakeno oga mangeluka nokage li unene pambelewa opo mbaka yaali ya kale ya mangeluka okwiipopila yoyene. Mengestrata oku na andola okudhana onkandangala yi wetike okushilipaleka kutya omauyeleele agehe ga simana oga kundathanwa.



UUMBANGI POMAPULAKENO

Mengestrata ota ka pulakena koombangi kehe dhoka tashi vulika dhi na omauyeleele ge na oshilonga. Aantu ayehe yaali otaya vulu okweetelela oombangi kompangu dhi popile omahokololo gawo. Otaya vulu wo okupula omunambelewa gompangu a longekidhe eithano lyopampangu kombangi ya simana ndjoka ihayi ya kompangu pahalo lyayo yene (ngaashi omundohotola ngoka a panga iilalo ya za mehepekathano lyomegumbo). Mengestrata otashi vulika wo a ithane oombangi dhi gandje omauyeleele kombinga yoshipotha. Oombangi dhoka itadhi vulu okuya kompangu, otadhi vulu okunyola omishangwahokololo dhawo, ngele aantu mbaka ayehe yaali oye shi zimine.

Eithano oloyo etseyithilo lyopambelewa tali lombwele omuntu e ye kompangu mesiku lyontumba. Okwiidhimbika eithano ndika oshi li ekaulonyanga.

Mengestrata ota ka tala komaumbangi kehe ngoka ge na oshilonga. Uumbangi mbuka otau vulu okukwatela mo:

- omageelo gonale ge nasha niikoya yomahepeko gomegumbo nenge iikulumuna yilwe
- oolopota dhiihokolola yonale yi nasha nomalombwelo gopaveta ge nasha negameno ga kwatela gumwe nenge ayehe
- omanyenyeto kopolisi ge nasha nomahepeko gomegumbo ga kwatela mo gumwe nenge ayehe
- omalondodho gopambelewa ga gandjwa kopolisi ge nasha nomahepeko gomomagumbo
- omakaleko gonale ge nasha nomalombwelo gegameno lyopaveta.

Oshitopolwa 12(4) & 16(6), Ompango 4(7), 4(9)-4(11)

OSHIKE HASHI NINGWA PO PEHULILO LYOMAPULAKENO?

Mengestrata ota vulu okuninga ngeyi:

- okugandja elombwelo lyegameno lyopakathimbo (nenge iitopolwa yimwe yalyo) meuthoveta lyegameno lya hugunina
- okudhima po elombwelo lyegameno lyopakathimbo (nenge iitopolwa yimwe yalyo)
- okulundulula iitopolwa yimwe melombwelo lyegameno lyopakathimbo noku yi tula melombwelo lyegameno lyahugunina

NENGE

- okugwedha mo iitopolwa yimwe iipe melombwelo lyegameno lyahugunina mbyoka kaya li mo melombwelo lyegameno lyopakathimbo, ndele uuna ashike ayehe yaali; omuningi gweindilo nomutamanekwa opo ya li pomapulakeno.

Ngele elombwelo lyegameno lyopakathimbo ka lya li po manga omapulakeno inaga ningwa, ompangu otayi vulu okugandja elombwelo lyegameno pehulilo lyomapulakeno, ndyoka tali kala euthoveta lyelombwelo lyegameno lyahugunina.



Oshitopolwa 12 (16)-12(17)

Ngashingeyi onda uva omahokololo geni amuhe, nondi wete kutya opwa li ehepekathano lyomegumbo megumbo ndika. Otandi ka ninga elombwelo lyegameno lyopakathimbo li ninge euthoveta lyegameno lyahugunina.

ELOMBWELO LYEGAMENO LYOPAVETA LYAHUGUNINA

Elombwelo lyegameno lyopaveta lyahugunina otali ka gandjwa ngele mengestrata okwe shi mono mo kutya omahepekathano gomegumbo oga ningwa, konima yokutala komaumbangi ngoka ga etwa komeho gompangu. Iitsa mbyoka yi na okutalwa oya faathana naambyoka yi nasha nelombwelo lyegameno lyopakathimbo.

Elombwelo lyegameno lyopaveta lyahugunina otali ka pewa omutamanekwa. Okopi yelombwelo ndika otayi ka tuminwa kositaasi shopolisi ya tumbulwa komuningi gweindilo mpoka opo omuntu nguka ta ka vula okulopota ekaulonyanga kehe/etaaguluko lyelombwelo ndika lyegameno.

Elalakano lyokutuma okopi yelombwelo lyegameno kositaasi shopolisi okutseyithila opolisi shi nasha nomukundu nguka. Komanda gositaasi shopolisi oku na oshinakugwanithwa shopaveta okulombwela aanambeleva ayehe positaasi kutya aantu ya tumbulwa melombwelo lyegameno oye li moshiponga shontumba.

Ngele osha kwatela mo aanona, okopi yelombwelo lyegameno oyi na okutuminwa kUuministeli wLinima wAakiintu nOnkalonawa yAanona, opo omukundu gwawo gu talike ko ngele ope na okukatukwa oonkatu dhimwe dha gwedhwa po okugamena aanona.

Oshitopolwa 13, Ompangu 10

OMAUTHO GOMALOMBWELO GEGAMENO LYOPAVETA

Elombwelo lyegameno lyopakathimbo nenge lyahuguninna ohali vulu okulundululwa li opalele omukundu ngoka gu li po.

Omalombwelo agehe gegameno lyopaveta otaga lombwele omutamanekwa kaa ninge we omahepeko gomegumbo.

Omalombwelo gegameno lyopaveta otashi vulika ga kwatele mo omautho taga landula mpaka:

1. iilwitho

elombwelo u gandje ondjembo nenge oshilwitho shontumba kopolisi.

2. oonkalo dhokwaananga ekwatathano

(a) elombwelo kaa hedhe popepi nanakunyeneyeta nenge pegumbo lye, ehala lyiilonga, osikola nsht.

(b) Elombwelo kaa popye/kwatathane nanakunyeneyeta

OSHOWO/NENGE

(c) omalombwelo ga faathana ga kwatela mo aantu yalwe mboka ye li moshiponga (ngaashi aanona yanakunyeneyeta nenge aanegumbo lye)

Aantu ayehe ya kwatelwa mo meuthoveta lyegameno oye na okutumbulwa komadhina. Ngele oshitopolwa shika sheuthoveta osha kwatela mo omuntu omutitatu kee shi aanona yanakunyeneyeta nenge mboka ye li metonatelo lye, omuntu ngoka oku na okugandja eziminino pamushangwa opo a kwatelwe mo.

3. egumbo lyopamuhanga/lyawo ayehe

elombwelo a ze mo megumbo lyawo, kutya nee oye mwene gwalyo nenge he li thetha/okuhiila.

Eutho ndika ohali ningwa ashike miipotha moka mu na eyehameko palutu. Mengestrata ota ka ninga elombwelo ndika konima ashike ngele okwa tala kiitsa tayi landula:

- egumbo/ehala oya kala mo ethimbo li thike peni
- ompumbwe yolukalwa/egumbo lyanakunyeneyeta oshowo aanona nenge aapambeke yalwe ye li metonatelo lyanakunyeneyeta
- omaupyakadhi gwontumba taga vulu okuholoka po komutamanekwa nenge omuntu kehe, ngaashi aanegumbo/iilyo yefamili lyomutamanekwa mboka haya lumbu pamwe naye megumbo ndyoka.

Oshitopolwa shika shelombwelo lyegameno otashi vulu okukwatela mo eutho kombinga yelongitho lyiikalimo yomegumbo, ngaashi iipoleki/iikwaipundi. Ngele osha pumbiwa, otali vulu okukwatela mo eutho tali ti kutya opolisi nayi kuthe mo omutamanekwa megumbo, nenge kutya opolisi nayi ye pamwe nomutamanekwa a ka tale ko oonguwo oshowo omaliko galwe gopaumwene megumbo netonatelo lyopolisi.

4. egumbo/olukalwa lulwe

elombwelo okufuta iifuta yokuhiila yegumbo/ehala limwe tamu zi nakunyeneyeta, nenge ngele hasho okulongekidha ehala limwe moka nakunyeneyeta ta ningi ha kala.

Ndjika ompito onkwawo miipotha moka mbaka yaali haya zi megumbo/ehala limwe, ngele omutamanekwa ina lombwelwa a thige po egumbo moka haya zi ayehe. Kiitopolwa yokuushayi, elombwelo otashi vulika li kale kutya omutamanekwa na ka dhikile/tungile nakunyeneyeta egumbo limwe lyopamuthigululwakalo/lyiiti.

5. okukala nomaliko

elombwelo okugandja po omaliko gamwe gopaumwene kunakunyeneyeta (ngaashi iihauto, iilongitho yomomapy, iimuna, iikwaipundi, uumbo wootjeke, uukalata wokulanda, iizalomwa yaanona oshowo iidhanitho, omikanda dhimwe dhopaumwene, ooshapi, uumutse nenge iinima yilwe yopaumwene).

Elombwelo lyompangu otali vulu wo okuningilwa nakunyeneyeta a gandje po omaliko gamwe gopaumwene komutamanekwa, unene ngele nakunyeneyeta oye ta kala megumbo kwali lyawo ayehe.

6. egameno lyomaliko

elombwelo otali vulu okupewa nakunyeneyeta nenge omutamanekwa kaa landithe po, yonagule nenge okweelekahi omaliko ngoka mukwawo e na oshilonga nago nenge kwa tegelelwa e ga longithe.

Oshiholelwa, ngele omulumentu nomukiintu oya hokanathana mondjokana yeliko li li mumwe, omukulukadhi okwa hala oshihauto shefamili nonando oshi li kedhina lyomusamane gwe.



7. egameno lyaanona

Elombwelo lyegameno otali vulu okukwatela mo omautho gegameno lyaanona mboka ya gumwa konkalo ndjika:

- elombwelo lyosapota yopakathimbo
- elombwelo lyopakathimbo li nasha nesiloshisho lyaanona (esiloshimpwiyu lyawo lyesiku nesiku) nenge a kale nompito okuthika paanona (oku ya talela po)

Oshiholelwa, elombwelo otashi vulika li gandje ashike esiloshisho lyaanona kunakunyengeta nokupitika etalelopo lyomutamanekwa awike metonatelo lyomuniilonga gopankalathano nenge omunegumbo gwontumba. Omalombwelo ge nasha nosapota, esiloshisho netalelopo, dhika oonkatu ashike dhopaulumwempumbwe. Aantu mbaka yaali otaya vulu okupotokonona mo iinima mbika pakulongitha omilandu dhopaveta dhoshito mbala ngaashi tashi vulika.

8. omalombwelo galwe gopaveta

Mengestrata ota vulu okukwatela mo omautho galwe gopaveta ngoka ga pumbiwa okugamena onkalonawa yanakunyengeta oshowo aanona nenge aantu yalwe ye li metonatelo lyanakunyengeta.



9. ekwatho lyopolisi

Mengestrata otashi vulika a kwatele mo elombwelo kopolisi kutya nayi –

- konge nokukutha ko ondjembo nenge oshilwitho shilwe komutamanekwa
- opolisi nayi ye nanakunyengeta kehala lyontumba yi mu kwathe a ka tale ko iinima ye yopaumwene e li megameno.

Oshitopolwa 14

ELOMBWELO LYOPAVETA LYEGAMENO LYAHUGUNINA OHALI KWATA ETHIMBO LI THIKE PENI?

Omautho gayooloka gelombwelo lyegameno otaga vulu okukala ge na oonkondo muulethimbo lyayoolokathana.

Omalombwelo gopaveta ge nasha negumbo/ehala lyopamuhanga oshowo iikalimo yalyo

- Elombwelo lyopaveta komutamanekwa a ze mo mehala/egumbo lyeni otali vulu okukala li na oonkondo muule wethimbo ngele olindji –
 - oomwedhi hamano (ngele egumbo olyomutamanekwa)
 - omvula yimwe (ngele egumbo/ehala olyeni amuhe)
 - ethimbo kehe lya tulwa po kompangu (ngele egumbo olyanakunyengeta).
- Ngele egumbo/ehala ohaye li hiila ayehe, elombwelo komutamanekwa a ze mo megumbo itali vulu okukala li na oonkondo konima yethimbo ndyoka a za mo.
- Elombwelo li nasha nokukala negumbo olya guma ngaashi iikwaipundi otali kala nethimbo ngaashi lyelombwelo lyokukala megumbo lyopamuhanga/lyawo ayehe.

Oveta inayi gandja ethimbo lyomalombwelo ge nasha negumbo/ehala lyomevi lyaayehe/lyokomikunda.

Omalombwelo gopaveta kombinga yesiloshisho lyokanona noku ka talela po

- Elombwelo lyopaveta li nasha nokanona nenge okutalela po aanona otali kala miilonga sigo lya lundululwa keutho ekwawo lyopaveta.

Shika omolwaashoka itashi kala nawa okupitika eutho ndyoka tashi vulika li gume egameno lyaanona li hule ashike kulyo lyene.

Omalombwelo gopaveta gosapota yopakathimbo

- Elombwelo lyopaveta lyosapota yopakathimbo otali vulu okukala miilonga uule woomwedhi ngele odhindji hamano.

Elombwelo lyopaveta lyosapota yopakathimbo oli li ashike onkatu yopaulumwempumbwe. Itali lalakanene okupingena po oshinakugwanithwa shoshito shompangu yi nasha noosapota.

Omautho galwe

Eutho kehe li nasha nelombwelo lyegameno lyopaveta otali vulu okukala miilonga uule wethimbo inali konda poomvula ndatu.

Oshitopolwa 15

OKULUNDULULA NENGE OKUDHIMA PO ELOMBWELO LYOPAVETA

Nakunyengeta, omuningi gweindilo nenge omutamanekwa ota vulu okuninga wo eindilo kumengestrata a lundulule nenge a dhime po elombwelo lyegameno lyopaveta ethimbo kehe.

Ngele nakunyengeta okwa ningi eindilo elombwelo lyegameno lyopaveta li dhimwe po, mengestrata ota vulu oku shi ninga inaa pu ningwa we omapulakeno. Ihe mengestrata oku na okushilipalelwa (a) kutya eindilo ndika olya ningwa pwaa na ethiminiko oshowo inali za komatilithe oshowo (b) kutya edhimopo/ehulithopo lyelombwelo lyopaveta itali ka tula nakunyengeta moshiponga nenge okanona nenge aantu yalwe ya gumwa kulyo.

Ngele omuningi gweindilo nenge nakunyengeta okwa ningi eindilo okulundulula elombwelo lyegameno lyopaveta, mengestrata ota tsikile pamukalo gwa faathana ngaashi neindilo lyopetameko.

Ngele omutamanekwa okwa ningi eindilo okulundulula nenge okuhulitha po elombwelo, nena mengestrata oku na okwiithana ishewe omapulakeno galwe, nanakunyengeta oku na okupewa etseyithilo muule womasiku 10. Nonando nakunyengeta ke li ompinge/ita pataneke eindilo lyomutamanekwa, mengestrata oku na okushilipalelwa kutya elundululo nenge ehulithopo ndika itali ka tula moshiponga nakunyengeta nenge okanona nenge aantu yalwe ya gumwa kulyo.

Otashi vulika okulundulula nenge okudhima mo iitopolwa yontumba melombwelo lyegameno lyopaveta, omanga iitopolwa yilwe tayi thigwa li yi li ngaashi yi li.

Mengestrata nenge aantu ayehe mbaka yaali otaya vulu okupula olopota yomuniilonga gopankalathano yi nasha noonkalo dhefamili okukwatha mengestrata a ninge etokolo ewanawa.

Oshitopolwa 17, Ompango 11

OMATALULULO GOMALOMBWELO GEGAMENO LYOPAVETA

Nakunyengeta nomutamanekwa ayehe oye na uuthemba okuninga eindilo lyetalululo lyetokolo kehe lyamengestrata li nasha nelombwelo lyegameno lyopaveta kOmpangu yOpombanda. Shika oshi na okuningwa muule womwedhi gumwe konima sho etokolo lya ningwa. Ngele omutamanekwa ota ningi eindilo lyetalululo li li ompinge nelombwelo lyegameno lyopaveta lyahugunina, elombwelo lyegameno lyopaveta ndyoka lyopakathimbo otali tsikile okulonga omanga eindilo lyetalululo tali tokolwa.

Oshitopolwa 18

OLYE TA THIKITHA ELOMBWELO LYEGAMENO LYOPAVETA KOMUTAMANEKWA?

Ngele omutamanekwa omo e li mompangu ethimbo elombwelo tali ningwa, elombwelo otashi vulika ashike e li pewe ye mwene. Ngele hasho, okopi yelombwelo lyegameno lyopaveta otayi ka thikithwa pambelewa komutamanekwa tashi ningwa komunambelewa gompangu, omutumwa gompangu nenge opolisi. Pakwalukehe ihapu kala nando ofuto ya sha kunakunyenya nenge omuningi gweindilo shi nasha nokuthikitha elombwelo lyegameno lyopaveta.

Oshitopolwa 20, Ompango 5

Iifuta: Mengestrata oku na oonkondo okulombwela nakunyenya nenge omutamanekwa a fute oshimaliwa shontumba nenge iimaliwa ayihe yi nasha nomapulakeno, konima yokutala omaihumbato gawo oshowo omuthika gwawo giiniwe/oshimaliwa. **Oshiholelwa, omuntu ngoka ashike ta mana po ethimbo lyamengestrata owina otashi vulika a lombwelwe a fute oshitopolwa shimwe shiifuta.**

Oshitopolwa 20

OSHIKE HASHI NINGWA PO NGELE OMUTAMANEKWA OKWA TAAGULUKA ELOMBWELO LYEGAMENO LYOPAVETA?

Oshi li oshikulumuna okuyonagula/okutaaguluka elombwelo kehe lyompangu, mwa kwatelwa elombwelo lyegameno lyopaveta.

Oshiholelwa, ngeno elombwelo lyegameno lyopaveta otali utha kutya omutamanekwa ina ya nando mekwatathano nanakunyenya, ndele ohe shi ningi ashike. Nakunyenya oku na okutseyithila opolisi. Ota ka pulwa a ninge omushangwahokololo tagu gandja omauyeleele nkene omutamanekwa a teya elombwelo lyegameno lyopaveta. Ota vulu wo okutulila mo omutamanekwa oshipotha shimwe shi ili, ngele omaihumbato/iilonga oya nika oshikulumuna shilwe, ngaashi okuyonagula nenge edhengo.

Opolisi oyi na oonkondo okukwata po omutamanekwa pwaa na omukanda gwekwatopo ngele ope na omauyeleele gongushu okufekela kutya elombwelo lyegameno lyopaveta olya taagulukwa. Efekelo kutya elombwelo lyegameno lyopaveta olya taagulukwa otali vulu okwiikwatelela komushangwahokololo gwanakunyenya, omushangwa okuza komuntu gulwe, nenge shoka sha monika po komunambelewa gopolisi.

Omutamanekwa ngoka a pula omuntu omutitatu a ninge sha tashi yonagula elombwelo lyegameno lyopaveta otashi ka talika ko sha fa oye mwene a taaguluka elombwelo lyegameno lyopaveta. Oshiholelwa, ngele omutamanekwa okwa pula kuume ke a tilithe nakunyenya, shoka eyonagulo nale lyelombwelo lyegameno lyopaveta li na okupangulilwa omutamanekwa.

Oshitopolwa 16 (1)-(3), 23

EGELO OLINI LYOKUTAAGULUKA ELOMBWELO LYEGAMENO LYOPAVETA?

Egeelo okutaaguluka elombwelo lyegameno lyopaveta N\$8000 nenge okutulwa mondholongo uule woomvula mbali nenge ayihe iyali oshita.

Oshitopolwa 16 (1)



Aalumentu yamwe moshigwana shetu oye hole okukala poondunda dhomanwino, taya kolwa, nokulala naakiintu kehe pwaa na egameno nopamukalo ngoka taya kaula oHIV/AIDS, taya shuna komagumbo ya kolwa nokutameka okudhenga aaholike yawo nokuya kuna oHIV/AIDS. Oshinima shika shoshili otashi yemateke, shaalumentu yetu yethimbo ndika. Otashi sitha unene ohoni sho aakiintu mbaka itaya dhengwa ashike, ihe otaya dhipagwa nokutelekwa nokuli.

Omusimanekwa Kawana, Omupehaminista gUuyuuiki
Oompata mOparliamende dhi nasha nOveta yOkukeelela Omahepekathano mOmagumbo

Ngele omuntu okwa kongo omayele kaakuluntu yontumba, ayehe otayi ku lombwele kutya, “Shoka oshinima shopaumwene, ino ke shi lopota.” Ngaka omayele hatu mono. Otashi teya omukumo aakiintu okuya kopolisi nokulopota. Iinima yinipo yopaumwene taya popi ngele aantu otaya si, aakulupe aakiintu taya kwatwa onkonga, aanona taya lalwa komatha? Oshinima shopaumwene mpaka oshinipo?

Omusimanekwa Sioka
Oompata mOparliamende dhi nasha nOveta yOmahepekathano gOmomagumbo

OPE NA NGAA OMAGAMENO GE NASHA NELONGITHONAYI LYOMALOMBWELO GEGAMENO LYOPAVETA KOONAKUNYENYETA?

Eeno. Ngele nakunyeneyeta okwa gandja eziminino omutamanekwa a ninge sha shoka tashi mu taagulukitha elombwelo lyegameno lyopaveta, nena kape na ekaulonyanga lya ningwa. Oshiholelwa, andola meuthoveta omu na okatopolwa kutya inapu kala ekwatathano, ndele nakunyeneyeta oha hiya ishewe omutamanekwa e ye megumbo lye. Moshinima shi li ngeyi, omutamanekwa ita vulu okupangulilwa etaagulukoko lyethoveta. Ihe itashi vulika paveta nakunyeneyeta a gandje eziminino lyoludhi kehe lwehepeko lyopalutu.



Onda li tandi dhiladhila kutya otandi vulu okweenda ponto elombwelo lyegameno lyopaveta okugalula omusamane gwandje omukulu, ihe ngashingeyi ongame nguka ndi li muupyakadhi.

Ngele nakunyeneyeta okwa gandja omauyelele giifundja nenge taga pukitha kopolisi shi nasha netaagulukoko lyelombwelo lyegameno lyopaveta, nena nakunyeneyeta okwa kaula onyanga/oku na ondjo. Ota vulu oku mona egeelo lyokapandi N\$4000 nenge okutulwa mondholongo uule womvula yimwe, nenge ayihe iyali oshita.

Oshitopolwa 16 (4)-(5)

OMATAMANEKELO GOSHIKULUMUNA SHOKUTAAGULUKA ELOMBWELO LYEGAMENO LYOPAVETA

Omlandulathano gowina moshitopolwa shOveta yi nasha nomapogolo ga guma omahepekathano gomomagumbo ohaga longithwa sha faathana nomapogolo giikulumuna mokuteya omalombwelo gegameno lyopaveta. Omlandulathano ngaka otaga ka yelithwa nawa moshitopolwa tashi landula.

Oshitopolwa 16 (7)

IINIMA YOPAUMWENE

Kape na omuntu a pitikwa okunyanyangidha omauyelele ge nasha nomalombwelo gegameno lyopaveta ngoka taga holola edhina lyomuningi gweindilo, nakunyengeta nenge aanona mboka ya kwatelwa mo – okuninga shila ompangu ya gandja epitikilo kutya omatompelo genyanyangidho lyomauyelele ngaka oge li muuwanawa woshigwana. Mokunyanyangidha omauyelele ngaka pwaa na epitikilo lyompangu oshi li oshikulumuna/epogolo. Egeelo lyepogolo ndika oli li sigo N\$10 000 nenge okutulwa mondholongo sigo uule womvula yimwe, nenge ayihe oshita.



Inandi kambadhala
tango okukonga ekwatho
oshoka ka kwa li nda hala ookuume
kandje ya leshe shi nasha nomaupyakadhi
gefamili lyetu moshifo. Oveta ompe otayi
gamene iinima yopaumwene yefamili. Ope
na onkundana yi nasha noshipotha moshifo,
ihe omauyelele agehe ngoka ge na okuulika
omadhina getu oga kuthwa mo!

Oshitopolwa 30

OMAPOGOLO GOMAHEPEKATHANO GOMOMAGUMBO

OVETA OYA ETA PO NGAA OMAPOGOLO OMAPE?

Aawe. Ihe omapogolo gopethimbo ndika haga ningwa momakwatathano gomahepekathano gomomagumbo oga talika ko “ongomapogolo gomahepekathano gomomagumbo” nohaga ungaukiwa nago pamikalo dhi ikalekelwa.

Omiyonena/omapogolo ngoka ga gwana okumona eyakulo ndika ongele ga ningwa momakwatathano guupambele ogo omiyonena dhiihuna (ngaashi, edhipago, ekwatonkonga, edhengo nonyanya nokutsuwa) oshowo omiyonena dhilwe (ngaashi ekwatombambyona, eyugo kwahomatiwa, etaaguluko lyoveta, ehanagulo lyomaliko nomatukano, kokutya omuyonena gwetukano).

Okutaaguluka elombwelo lyegameno lyopaveta oshi li wo epogolo lyomahepekathano gomomagumbo.

Oshitopolwa 21, Ethaneko lyOtango



OLYE TA VULU OKUTULITHA MO OSHIPOTHA SHEPOGOLO LYOMAHEPEKO GOMOMAGUMBO?

Nakunyengeta nenge omuntu kehe ngoka e na olune nonkalonawa yanakunyegeta – ngaashi omuhungimwenyo, omupangi, omunambelewa gopolisi, omuniilonga gopankalathano, omulongiskola nenge omugandji gwiilonga.

Ihe omuntu awike ngoka a kwatelwa melombwelo lyegameno lyopaveta ta vulu okuninga ehokololo kopolisi, ta vulu okunyengeta kutya elombwelo lyegameno lyopaveta olya taagulukwa.

Oshi li epogolo okugandja omauyeleele giifundja kopolisi shi nasha neyono lyomahepeko gomomagumbo. Egeelo mushika oli li sigo N\$4000 nenge ondholongo sigo uule womvula yimwe, nenge ayihe oshita.

Oshitopolwa 22, 16 (7)



OPOLISI OHAYI VULU OKUNINGA PO SHIKE MIIPOTHA YOMAHEPEKATHANO GOMOMAGUMBO?

Omunambelewa gopolisi ngoka e na efekelo li na ongushu kutya ope na epogolo lyehepeko lyomomagumbo olya ningwa ota vulu okuninga iinima mbika tayi landula mpaka:

- okukwata po omufekelwa gomuyonena pwaa na omukanda gwekwatopo
- ota vulu okugandja elondodho lyopambelewa komufekelwa ndyoka tali ka tulwa miilonga ngele opwa holoka ishewe omaupyakadhi.

Ihe omunambelewa gopolisi oku na okutala ko tango shoka nakunyengeta a hala.

Opolisi otashi vulika wo yi hadhe iilwitho pwaa na omukanda gwehadho. Ongele ya mona oshilwitho nenge ya lombwelwa kutya oshilwitho osha li pehala lyomahepekathano gomegumbo.

Opolisi oyi na uuthemba okupula kehe gumwe e li po kutya iilwitho oyi li peni.

Oshitopolwa 23

OMALONDODHO GOPAMBELEWA

Omalondodho gopambelewa oga nuninwa oonkalo moka nakunyengeta ta pula ekwatho kopolisi, ihe ina hala omuntu a kwatwe po. Elondodho lyopambelewa okuza kopolisi okutseyithila omuhepeki a tseye kutya opolisi oyi shi uupyakadhi oshowo kutya oshihakanwa shomuyonena osha kong'a ekwathelo.

Ngele omunambelewa gopolisi okwa gandja elondodho lyopambelewa, komanda gositaasi oku na okutula okopi yelondodho mepeko positaasi shopolisi mpoka. Komanda gositaasi ota ka tuma ishewe okopi ndjika kOmbelewa yOmutamaneki-Ndjayi, ngoka te yi tula mepeko membo lyowina. Ngele ope na oshipotha lwanima, omalondodho gonale ohaga vulu okuningitha iinima yi endeleye nayi omuhepeki. Kape na ongamba yomalondodho gopambelewa ngoka ge na okugandjwa.

Egeelo okutaaguluka elondodho lyopambelewa oli li sigo N\$2000 nenge ondholong'o sigo oomwedhi hamano.

Oshitopolwa 23 (1) Ompango 12, 4 (9)(b)



Aahepeki yamwe ohayi idhimbike omalondodho gopambelewa, ihe omalondodho ohashi vulika ga kwathe miipotha yimwe. Nakunyengeta oku li pompito yi li nawa okutseya nkene omuhepeki te ki ihumbata.

OMUFEKELWA GWEPOGOLO NDIKA OHA VULU OKUMANGULULWA PAMBOOLOHA?

Epulo li nasha nombooloha otali ungaukiwa nalyo pamukalo gwa faathana nomiyonena/iikulumuna iikwawo yilwe, ope na ashike omayooloko omashona ga simana. Ngaashi miipotha yekwatonkonga, nakunyengeta oku na okutseyithilwa shi nasha niihokolola yi nasha nombooloha, nokupewa ompito a gandje omauyebelele taga pumbiwa komeho gompangu. Oshiholelwa, ngele omuntu ngoka okwa li a kwata ndele ta mangululwa okwa ningile nakunyengeta omatilitho, shika otashi vulu okuninga omatompelo oku mu tindila ombooloha.

Ngele nakufekelelwa omuyonena gwehepeko lyomegumbo okwa mangululwa nombooloha, ope na aluhe okukala iinakugwanithwa yontumba ya kgekwa kombooloha kutya ina ya nando mekwatathano nanakunyengeta, eutho lyombooloha otali mu indike kaa kale nondjembo nenge oshilwitho shontumba.

Ngele otashi opalele, ompangu otayi vulu okugandja eutho kutya omufekelwa na tsikile okugandja osapota yoshimaliwa kunakunyengeta oshowo kaanegumbo/aasilwashimpwiyu ye omanga e li pondje pambooloha, ngaashi sha kala manga ina kwatwa po.

Shika otashi ka shilipaleka kutya nakunyengeta ita liwa oshipungo pashimaliwa sho a longitha omauthemba ge.

Ompangu otayi vulu ishewe okugwedha po iinakugwanithwa yilwe kombooloha ngele otashi pumbiwa.

Ngele nakunyengeta ina holoka piihokolola yi nasha nombooloha, oku na okutseyithilwa kutya omufekelwa okwa mangululwa pambooloha, noku mu lombwela iinakugwanithwa ayihe ya kgekwa keindilo lyombooloha.

Oshitopolwa 24, Ethaneko Etiyali, Ompango 13

OSHIKE U NA OKUNINGA NGELE OMUNTU NGOKA A MANGULULWA PAMBOOLOHA OTE KU NINGILE OMATILITHO?

Ou na oku shi lopota mbala kopolisi. Opolisi oyi na ihe okudhengela omutamaneki opo eindilo lyomutamanekwa li ningwe kompangu ombooloha li kuthwe po.

Okanona ka ke na ondjo – ina ka pula opo ka valwe onkee oke na okugamenwa moonkalo adhihe.

Omusimanekwa Nandi-Ndaitwa, Ominista yIinima yAakiintu nOnkalonawa yAanona Oompata mOparliamende dhi nasha nOveta yEkeelelo lyOmahepekathano mOmagumbo

EPANGULO OTALI KA INDIKA OSHIGWANA SHI YE OKUPULAKENA?

Omapangulo gomiyonena dhomahepeko gomomagumbo, ngaashi omapangulo gomakwatonkonga, ohaga ka pulakenwa mompangu inamu pitikwa aakwashigwana. Oshowo, ngaashi moshipotha shekwatonkonga, oshi li wo eyono okunyanyangidha omauyelele taga holola edhina lyanakunyeneyeta.

Ethaneko Etiyali

OKWEENDELELWA PO KOMAPANGULO

Ope na oompango dhontumba dha nuninwa okushilipaleka kutya omapangulo giipotha yomiyonena dhomahepekathano gomomagumbo oga pangulwa mbala ngaashi tashi vulika.

Omutamaneki ngoka a mono oshipotha shomuyonena gu nasha nehepeko lyomegumbo oku na oku shi tula melandulathano lyompangu mbala ngaashi tashi vulika. Oshipotha shika oshi na okutalika ko tango kiipotha iikwawo yilwe.

Ngele ope na etsiliko moshipotha shomuyonena gu nasha nehepeko lyomegumbo, omupanguli nenge mengestrata ota vulu okugandja elombwelo kutya omufekelwa na kale mondholongo sigo esiku limwe epe lyompangu tali uthwa – nonando omufekelwa okwa li nale a mangelulwa pambooloha. Ompangu otayi vulu okuninga elombwelo ndika AWIKE NGELE ope na uumbangi kutya omuyonena gwehepeko lyomegumbo ogwa ningwa OSHOWO uumbangi kutya oshihakanwa otashi vulika shi li moshiponga ngele omufekelwa ina kalekwa mokakuma.

Oshitopolwa 32, Ompango 16

OKUSHUNITHA PEVI EHALUKO MOLWEPANGULO

Omutamaneki oku na oshinakugwanithwa shopaveta oku ku pa omauyelele ngoka taga shunitha pevi ehaluko li nasha nepangulo. Omutamaneki omu na okutsakanena manga ku na ethimbo e ku yelithile lela kutya oshike tashi ka ningwa po mompangu. Omutamaneki otashi vulika a pule omuniilonga gopankalathano e ku fale kondunda yompangu kuyele e ku ulikile mpoka to ka kuutumba noku ku pa omauyelele ogendji kushoka tashi ka ningwa po esiku lyepangulo. Otashi vulika mu ye mo ishewe momushangwahokololo ngoka wa gandja kopolisi omanga epangulo inali tameka, opo wi idhimbulukithe iinima mbyoka wa popile. Ou na okupopya iinima mbyoka wa popile mompangu mbyoka wa lombwela opolisi.

Oshitopolwa 24

EGEELO LYOMUYONENA GOMAHEPEKATHANO GOMOMAGUMBO OLINI?

Egeelo/ositalafa oyi ikwatelela kuukwatya woshikulumuna/omuyonena. Otashi vulika shi kale ofuto, ethimbo lyontumba mokakuma, nenge egeelo lya kuthwa po (ethimbo lyokuya mondholongo lya tsilikwa shampa ashike eyono ndyoka itali endululwa we). Otashi vulika u kale ehuliloshiwike mokakuma nenge to longo iilonga yomoshigwana. Oompito dhika ohadhi vulu okukala ombwaanawa unene miipotha moka eyono inali dhiginina unene, nenge moka omuyoni ha longo oshowo kutya ina hala okukanitha iilonga ye.

Nakunyengeta ota ka pewa ompito a gandje omadhiladhilo ge kompangu kombinga yaashoka ta dhiladhila tashi vulika shi kale egeelo tali opalele. Ngele nakunyengetwa okwa sa, omadhiladhilo ngaka otaga pulwa omukwanezimo/omupambe.

Oshitopolwa 25, Ompango 13



OOLISINISA DHOONDJEMBO

Omuyonena gwepogolo lyomahepekathano gomomagumbo gwa kwatela mo edhengo kolutu otashi vulika li kuthithe omuntu olisinisa yondjembo uule woomvula mbali, nenge ethimbo ele. Ngele ondjembo oya longithwa meyono, nenge ngele omufekelwa okwa kwata ondjembo manga e li koho yiikolitha nenge iingangamithi, nena otashi vulika a talike ko kutya ina gwana okukala nondjembo muule wethimbo lyontumba.

Ethaneko Etiyali

Ontontwaveta ndjika otayi kambadhala wo okweeta po ombili mokati koshigwana shetu, unene ombili nengungumano momagumbo getu. Omahepekathano gomomagumbo ogo uulunde, omukithi gokankela, oshoka otaga dhipaga kashona nakashona oongushu noohedhi dheihumbatonawa moshigwana shetu oshigundjuka, onkee oge na okupangulwa nonyanya.

Omusimanekwa Tsheehama,

Omukuluntuwiliki Ndjayi gwIilonga yUundaadhi wEpangelo moNamibia
Oompata mOparliamende dhi nasha nOveta yOkukeelela Omahepekathano mOmogumbo

OOPROHOLAMA DHEZULONKALO KAAYONI YOMAHEPEKATHANO MOMAGUMBO

Miilongo yimwe, aahepeki ohaya tumwa koopropholama dhehungomwenyo ongompito yilwe yepangulilo lyoshikulumuna. Omufekelwa otashi vulika a pewe ompito epangulo lyoshikoya she li tsilikwe ngele okwa zimine okuya kopropholama yehungomwenyo ndjoka ya simanekwa. Ngele omufekelwa okwa teya euvathano lyezulonkalo ndika, nena oshipotha she shomuyonena otashi tsikilwa nasho. Ihe ngele oproholama yezulonkalo okwe yi mana nawa, nena oshipotha she otashi ekelwahi.

Ompito onkwawo okulongitha ooproholama dhezulonkalo ongegeelo. Konima ngele omufekelwa okwa pangulilwa eyono lyehepeko lyomegumbo, ompangu otayi vulu okukaleka egeelo alihe nenge oshitopolwa shalyo nelalakano a ka mane oproholama yezulonkalo tali opalele. Ngele omuyoni okwa ndopa okumana nawa oproholama yezulonkalo, nena ekuthopo lyegeelo ote li galulilwa.

Oompito dhika otadhi vulu shili okukwatha kaayoni yoshikando shotango, mboka inaya ninga omuyonena gwa dhiginina. Otadhi vulu wo okukwatha miipotha moka oshihakanwa inashi hala omuyoni a tulwe mondholongo, ihe okwa hala ashike omahepeko ga monenwe ehulilo.

Okuza momumvo 2004, Namibia ina kala nando nooproholama dhezulonkalo dholudhi nduka kaayoni, ihe ooproholama dhomadheulo gaaniilonga yopankalathano nkene ye na okulonga naahepeki aalumentu oge li metifa.



...Osha pumbiwa unene opo moosikola dhetu opo mu longwe oongushu dhi nasha nuuthikepamwe wopaukawashike-ko-kantu oshowo uuyuuki yi ndungikwe aagundjuka yetu. Aagundjuka yetu oya pumbwa okukonkolelwa okutaamba ko omakwatathano gopaupambele/gomegumbo pahalo lyawo yene, pamaiyuvu oshowo omakwatathano gopafamili, ihe hamakwatathano goonkondo nenge goonkundathana dhomauwanawa gopaliko. Oosikola odhi na okutameka okuzula omaihumbato ge nasha nomukundu guukakwashike-ko-kantu ga za momatedho guufukulume womulumentu pamuthigululwakalo.

Omusimanekwa Ulenga

Oompata mOparliamende dhi nasha nOveta yOkukeelela Omahepekathano mOmagumbo

OONKONDO NIINAKUGWANITHWA YOPOLISI

OPOLISI OYI NA OONKONDO DHINI MOMAYONO GOMAHEPEKO GOMOMAGUMBO?

Opolisi oyi na oonkondo dhika:

- okukwata po omufekelwa pehala lyoshiningwanima pwaa na omukanda gwekwatopo
- okugandja elondodho lyopambelewa
- okuhadha nokukwata ko iilwitho pwaa na omukanda gwehadho

Omunambelewa gopolisi otashi vulika a pule omuntu kehe ngoka a li poshiningwanima shi nasha naampoka oshilwitho shi li. Omanga ehadho nekuthoko lyiilwitho inali ningwa, omunambelewa gopolisi oku na (a) okumona oshilwitho nenge okupewa omauyelee kutya oshilwitho opo shi li oshowo (b) oku na okukala neitaalo kutya oshilwitho shika otashi vulika shi ka etele nakunyengeta oshiponga oshinene kolutu.

Oshitopolwa 23

IINAKUGWANITHWA YINIPO OPOLISI YI NA MOKUKWATHA IHHAKANWA?

Inspekta Omukuluntu gOpolisi oku na okugandja omalombwelo ge nasha niinakugwanithwa yopolisi miinima ya nika omahepekathano gomomagumbo. Omalombwelo ngaka oge na okukwatela mo iitsa tayi landula (iiholelwa oya kuthwa momalombwelo gopolisi ngoka ge li natango inaga pwa thilu pethimbo oshinyolwa shika tashi ningwa):

- omalandulathano okugandja egameno lyopolisi koonakunyengeta naanona nenge aantu yalwe ye li metonatelo lyawo.

Oshiholelwa, ngele elombwelo lyegameno lyopaveta olya gandjwa, nena komanda gositaasi ota ka tseyithila aapolisi ayehe positaasi kutya nakunyengeta oku li moshiponga, nokushilipaleka kutya egameno lya pumbiwa olya ningilwa nakunyengeta oshowo omuntu gulwe a kwatelwa megameno ndyoka lyopaveta. Oondondo dha gwedhwa po dhegameno otashi vulika dhi gandjwe miipotha mbyoka ya nika unene oshiponga, ngaashi miipotha moka mwa longithwa ondjembo. Opolisi otayi ka ya wo pamwe nanakunyengeta okushilipaleka kutya okwa kutha mo omaliko ge gopaumwene okuza megumbo/ehala lyontumba ngele osha pumbiwa.

- omalandulathano okushilipaleka kutya opolisi oya yamukula mbala nokweendelela po elopoto kehe li nasha nomuyonena gomegumbo, oga kwatela mo omalopoto kutya elombwelo lyegameno lyopaveta olya taagulukwa.

Oshiholelwa, opolisi otayi ka tegelelwa yi yamukule mbala mbala ngele omuntu okwe ya kombelewa yokutula mo iipotha ta nyenyeta shi nasha nomahepeko gomegumbo nenge ta dhenge ongodhi ta lopota eyono lyomahepekathano gomomagumbo.

- omalandulathano okupulapula iihakanwa yomiyonena dhomegumbo oshowo oombangi kehe opo ya vule okupopya nemanguluko

Oshiholelwa, opolisi oyi na okulongekidha omushangwahokololo okuza komuntu e mu fa paukakwashike-ko-kantu ongomunyengeti mpoka tashi vulika. Ehokololo oli na okukuthwa ko pehala mu li po one amuke, ihe nakunyengeta otashi vulika a kale nakuume ke nenge omuntu te mu kwathele ngele osho a hala.

omauyelele ngoka opolisi yi na okugandja koonakunyenya, aafekelelwa yomiyonena oshowo aanegumbo/iilyo yefamili ongaashi:

- ekwatho okumona epango lyopaunamiti
- omalukalwa ngoka ge li po nenge omayakulo galwe taga opalele
- osheenditho okufala kepango lyopaunamiti nenge okufalwa kegumbo
- omauthemba nomakandulopo gomikundu ngoka ge li po paveta nankene haga longo.

Oshitopolwa 26

OKUHWEPAPALEKA Omayakulo GOPOLISI

Inspekta Omukuluntu gOpolisi oku na okugandja omushangwahokololo gokomumvo kOminista yLinima yOmegumbo shi nasha nomalombwelo kopolisi ngoka ga gandjwa, oshowo kombinga yomadheulo ngoka ga pewa opolisi ge ya kwathe okugwanitha po iilonga yawo nawa oku shi talela momiyonena dhomahepeko gomomagumbo.

Opolisi otayi tegelelwa wo yi pungule oolopota dhiiponga yomahepekathano agehe gomomagumbo mbyoka ya tsakaneka, kutya nee kayi shi iipotha yiikumumuna ya tulilwa mo oonakuyona. Inspekta Omukuluntu ota ka ngonga po omiyalu adhihe dhokomumvo okuza moolopota dhika noku dhi tuma kOminista yLinima yOmegumbo.

Ominista yLinima yOmegumbo oku na okugandja olopota kOmutumba gOpashigwana omvula kehe, shi ikwatelela komauyelele ge nasha nomahepekathano gomomagumbo ngoka a pewa kuInspekta Omukuluntu. Olopota ndjika itayi tumbula omadhina gaantu mboka ye nasha niipotha yomiyonena dhomahepekathano gomomagumbo.

Oshitopolwa 26, 28



ONGONGA YOMIYONENA

Ongonga yomiyonena ogwo omukalondjigilile moka omukaulinyanga ta tengauka pokati kohole, eipombedhi neihumbato lyangungumano momathimbo gekuyunguto ndyoka tali eta omiyonena/ omahepeko kolutu, paihulo nenge pamaiyuvo.

Mpoka pethike ongonga tayi kwata omathimbo ogendjiyi tsakanene, opowo pethike ongonga tayi kutha ethimbo efupiyi tsakanene.

ETHIMBO “LYOKUNYANYUKILWATHANA”

Aahepeki ohayi ihumbata shayooloka konima yiiningwanima yomahepekathano. Yamwe ohayi idhimbike nenge yi ipatane omahepeko/omuyonena. Yamwe oya pe “ondjahi” ombedhi molwiinima ye yi popya nenge ye yi longa. Yamwe ohaya tila oku ku kanitha nohaya gandja ombili yoshili. Ondondo ndjika olundji ohayi lukwa “okunyanyukilwathana.” Omuhepeki ota ka kambadhala okuninga sha molwomahepeko/omuyonena gwe. Ohashi vulika a gandje ombili, ta tumu oongala nuukalata, ta landa omagano, nokukwathela megumbo, okukala pamwe naanona ye, okuya kongeleka, okumona ehungomwenyo, nenge okuninga omauvaneko. Omuhepeki otashi vulika a konge edhiminopo. Osha simana okukoneka kutya ondondo ndjika oyo onkambadhala oku ku galulila ishewe mekwatathano lyeni. Ondondo ndjika haaluhe yi li “okunyanyukilwathana” koshili.

Ongonga shotayl endululathana, omahepeko/omiyonena olundji otadhi indjipala nokudhiginina.

EKUYUNGUTO

Shika osha fa okweenda mombuga. Kape na shoka shi li mondjila. Kape na ompito okutengeneka kutya omuhepeki okwa hala lela shike. Omanga nee tashi vulika kape na omahepekathano gokolutu (nenge omahepeko gokolutu omashona), ope na ehepeko lyopamaiyuvo, omambandameko nomatilitho. Uumbanda womiyonena/ omahepekathano olundji oge na ondjundo ngaashi naana omuyonena/ ehepeko lyoyene.

OMAHEPEKATHANO

Shika osho oshilonga shoyene shehepeko/ omuyonena. Osha kwatela mo, omuyonena/ehepeko palutu, pamaiyuvo nopaihulo.

Kape na omulumentu ngoka ha si oshimpwiyu shili nonakuyiwa yoshigwana shetu ta vulu okundopa okukala nolune nonkalonawa yaanona naakiintu.

Omupresidende Sam Nujoma, 23 Septemba 1993.



Austrian
Development Cooperation



LAWYERS
ASSOCIATION
OF MALAGA



NAMIBIAN LITERACY TRUST

